

ASO GAFUA, 01 FEPUARI 2021

Na nofoia e le Fofoga Fetalai le Nofoa i le itula e 9:25 i le taeao.

Tatalo.

FOFOGA FETALAI: Ou te faasila sila atu ua toe amatalia Taualumaga ma Galuega a le Fono Aoao Faitulafono.

Malo le soifua, malo le lagi e mama.

ISI FAASILASILAGA A LE FOFOGA FETALAI

FOFOGA FETALAI: Talu ai le fia tausisia pea o le mamalu o le Palemene ma ana taualumaga, e fia faamanatu atu i sui usufono mamalu uma ina ia taumafai e aua ne i toe lagona se leo o le telefoni e tatagi i totolu o le Maota Fono a o faagaso lo Taualumaga ma Galuega o le tatou Fonotaga. Afai ae toe lagonaina se telefoni e faapena ona tatagi, o le a faatonu loa le Satini o le Maota ina ia aveesea mai le telefoni.

Ia, o le talosaga atu lea ma le agaga faaaloalo ina ia faapena ona tausia le mamalu o le tatou Fonotaga.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2020/2021 – felafolafoaiga faaauau i luga o le
faitauga faalua – Aso 9**

FOFOGA FETALAI: E tololo le Fono Aoao i le vaiaso talu ai ua maea ona saunoa le sui usufono mo le itumalo faaalalafaga o Falealupo.

Ma ou te tapa ma le faaaloalo se isi sui usufono e tulai mai e faaauau e tamua i lenei taeao.

Ia, ma le faaaloalo ou te tapa le Afioga i le sui usufono mo Faasaleleaga Nu.1 Sisifo lau Afioga Gatoloaifaana. Ia manuia le saunoaga.

**Afioga Hon GATOLOAIFAANA AMATAGA ALESANA GIDLLOW
(Faasaleleaga Nu.1 Sisifo):** Ia, e faatalofa atu i le Afioga i le Fofoga Fetalai i lenei taeao manino, taeao matagofie ua potopoto le Fonousu a Samoa.

E faatalofa atu foi i le afio o lau Afiogai i le Palemia, tainane lau aufono le mamalu o le Kapaneta, e faapea foi le afifio o Minisita Lagolago. O lea foi ua sasao atu le mamalu o Taitaifono o Komiti Faa-Palemene, ae tainane foi le mamalu o sui usufono o le Palemene ua tatou faatasi ma potopoto i lenei taeao. O lo o faapea foi ona matauina le afifio mai o Ofisa Sili o Pulega o Matagaluega ma Faalapotopotoga Tumaoti a le tatou Malo. E faapea foi le afio o le Afioga i le Failautusi, le Sui Failautusi ma le aufaigaluega o lo o tua i ai le Palemene i ana galuega fai.

Lau Afioga i le Fofoga Fetalai, ua maea ona e toto le niu i le tatou va faafeagai ai ma lo tatou Matai Sili, o le Atua lava lea o lo o faavae i ai Samoa. Ma e piiama atu, e avatu ai le agaga faafetai o lea ua molimoli laau i Fogaa, aua a le mafuta ma faatasi mai o Ia, e le manuia foi o tatou faiva o tatou faafeagai ai i lenei aso. Ia, o lo o faapea foi ona faafogafoga mai Samoa. O lenei taeao, o lea ua ou tamua, ma ou te faafetai tele mo lenei avanoa, o se taimi muamua ea lenei ua ou tautala muamua ai i se taeao.

Ma ou te fia faatalofa atu ai i le afio faafogafoga mai o Lana Afioga Mamalu O Le Ao o le Malo Samoa, i lau Afioga Tuimalealiifano Vaaletoa Sualauvi II le Tuaana ma lau Masiofo, ae tainane le faafogafoga a le Sui o le Fono a Sui Tofia, lau Afioga Le Mamea Ropati Mualia ma lou faletua.

Lau Afioga i le Faamasino Sili o le Faamasinoga a Samoa, e faatalofa atu ma faatulou atu. E faapea foi i le Peresetene o le Faamasinoga o Fanua ma Suafa, alii ma tamaitai Faamasino o Faamasinoga eseese a Samoa.

Ou te fia faatalofa atu foi i a tatou paaga mai atunuu mamaao, o i latou lava o lo o agalelei ma fesoasoani mai i auala eseese aua le atinaeina o si o tatou atunuu.

Ou te faatulou ma faatalofa atu i le faafogafoga tapuai mai a Samoa i ona tulaga faalupelupeina, aua Aiga ma latou Tama, o Tama foi ma latou Aiga, ae tainane le mamalu o le usoga a Pule ma Tumua, Ituau ma Alataua, Aiga i le Tai ma le Vaa o Fonoti.

E faatalofa faapitoa i le aufaigaluega paia a le Atua o lo o talafaauto ma faafalelemalu ia Samoa, ona o le tauasuina o le ipuvai o le soifua faaleagaga ma tatalo faatauanau i aso uma aua le saogalemu ma le filemu o Samoa. Faafetai tele mo talosaga.

E le vaea foi le falaooto aua paia ma mamalu o faigamalo a Tutuila ma Manua, le afio o le Kovana ma le Lutena Kovana, le Fofoga Fetalai ma sui o Maota e Lua o le Malo. Ou te faatulou i le mamalu aua Sua ma le Vaifanua, Fofo ma Aitulagi, Ituau ma Alataua, Saole ma Saleaumua ma le Launiu na Saelua, ae tainane le afifio o Faatui o le Motu, alaalatai Tootoo o le Faleula ma upu ia te oe le Manuatele.

Ou te fia faatalofa atu foi i le faafogafoga tapuai mai a lou itumalo o Faasaleleaga Nu.2 e pei ona faatulagaina ai nei tatou mo le palota tele o lo o lomaloma. A ao ou mamalu, o Iva ma ona Atitala ia Salelavalu ma Lalomalava. Salelavalu e susu ai lau susuga Sua, le Tupu na Tāusi, Maopu

o Nafanua ma le Aiga Sa Sua. Susu Tusani ma le Aiga Sa Tusani, susu Suaalii le Fofoga o Aiga, afio le Taofia ma le Suafa Lelevaga, afio foi le Taumaopu ma le mamalu ia te oe Sasilafaiga. O Iva e afio ai le paia i le Aiga Salevalasi, Ituvai na lua ia Matautia ma Magele, afio ai le Tootooalii, Tofilau na iva i ai Aiga o le Malietoa, o aiga na saili e le o iuogafa, ae na saili i lau tao ma le uatogi.

Afio foi le Matua ia Asomua, lau fetalaiga Leauanae o le tootoo o Fuifatu, alaalatai Sasulu ma le nofo a Ituaiga. Afio Toomata ma alo o Le Tagaloa Taito ma Leota, saualii tagata ia Fesaesaeai ma Fatalotu, Fofoga Fatalai o Aiga Lealiiee ma Moemai, o le paia lava lea ia Safune ma Taulauniu.

Lalomalava e afio ai le Tamaitai. Afio ai foi Aiga ma le Faletolu, susu ai le Susuga ia Gatoloaifaana, tainane le susu o le Falefa o alo o Atiulagi, afio ai foi Taito ma le Usoalii ma le latou matua ia Tanuvasamanaia. Alaalatai Sa Afuamua ma le nofo a Ituaiga. O lo o afio ai foi le Gafa ia Soanai ma Patane, susu Tuilaepa o le usoalii o Malietoa, alaalatai Tevaga o le tapaau fanua ma le Faleono. Afio le Toainafo ma alo o Tamaalelagi, le paia i le Muliagatele ma le malu o Salemuliaga.

E le galo le tapuaiga a le aufaigaluega paia i fatafitaaulaga eseese i totonu o le ta itumalo o lo o aumau ma faafalelemalu aua lava le tapueina o agaga ne i maumau ona o le alii o le lalolagi ua malosi i lenei vaitau. Faafetai mo le tapuaiga, o lenei ua lamalama faaiu galuega o lenei foi Paeaiga. I se taimi ona ou toe foi atu lea e molimoli atu se agaga faafetai e tusa ai ma lou tui mai o le mulipapaga, feula le mulila, tatalo mai ae alofaiva lo outou sui usufono, ae se i fai ane sa ta faafetai e tusa ai ma galuega sa faafeagai ai le ta Malo i lenei foi vaitau, i lenei Paeaiga.

Lau Afioga i le Fofoga Fatalai, ia, e ese foi lagona o lenei taeao. Ai ona o le Fonotaga mulimuli lenei o lenei Paeaiga mai le 2016 seia tau mai i le 2021. Sa ae mai ma le loto faafetai i filiga a itumalo ma le naunautaiga ia faatino ni galuega se tele, se tautua e iloga ai se tautua faaleauau, e le gata mo itumalo, ae faapea foi mo le tatou atunu. O se faigamalaga e le i mailoa pe tua i ni a, na o le Atua sa ia silafia, aua o Ia na te silafia lo ta ulufafo ma le ta ulufale. O lenei ua toe o se aga tuta lo ta sa o faatamasoaliiga o lenei foi Paeaiga aua Samoa ma sona manuia, ae paga lea lau Afioga i le Fofoga Fatalai, ua le atoa tupe o taulafoga, ua le nofoia le Nofoa o Lefaga ma Faleaseela, le Afioga ia Toleafoa Vaafusuaga Ken Poutoa, o ia lava sa fofogamua i so o se Tala Faatatau o Tupe ina ia muamua molimoli mai se lagona o le itumalo, ma ia maua muamua foi se faasoa mai le Malo i ni faamanuiaga mai lea tausaga i lea tausaga. Ia, aue ua maliliu toa ua maumau ai auupega o le taua. E leai se ta failoto, e pule le Atua e ana le soifua. Tau ia ina ia faamaise le Atua i le faletua ma le nofo a alo, le aiga, le itumalo ae tainane lana Ekalesia.

Sa faapea foi ona tatou faatofa atu i le Tofa ia Pau Sefo, ae faafetai ua pau se toa ae tulai mai se toa, lea ua tulai mai ai le Tofa ia Namulaulu na te faaauauina le tofi o le itumalo i lenei Paeaiga.

O lea foi ua faailo le Maota Fono o Samoa i se finagalo o le a malolo manumalo nisi o toe Ulutaia o lenei Maota i Paeaiga e fia ua tuanai, e i ai lau Afioga i le Fofoga Fetalai, lau Afioga Honorable Toleafoa Leaupepe Apulu Faafisi. Ua loa lau tautua, ua iloga lau tautua, o se tautua matavela, o se tautua e mau le toovae. Faafetai i lou onosai ma lou faapalepale i le tatou Maota, e toa-tasi oe ae 50 matou matou te faatiga atu ia te oe i aso taitasi o Fonotaga ae mau pea le toovae i lau Afioga. Ua faapea foi ona faaalialia le finagalo o le Afioga ia Honorable Aeau Peniamina, o se tasi foi sa galue i le Nofoa o le Fono Aoao a Samoa, ua afu foi lana tautua. Faafetai i le Atua mo ana auauna e foai mai aua Samoa. Faapea le Afioga ia Honorable Faasootauloa Taulapapa Pati, ua malo tau, malo tautua. Tainane le afio ai o le Afioga i le Minisita, le Afioga ia Honorable Tuitama Dr. Leao Tuitama. E mafaufau ma le agaga toeitiiti a faapea e faanoanoa, ae peitai, ia, e slafia e le Atua le mea sili mo le tagata. A uma ai se galuega ua ia tofia i ai ana auauna, ona maua lea o se sema, a o se sema e toe faaauau ai le tautua i totonu o aiga, totonu o Ekalesia, nuu ma afioaga.

O le matou tatalo, ia alofagia e le Atua lo outou soifua, faafualoa lo outou soifua, aua le faaauau pea o le tautua e tautua ai aiga, tautua ai nuu faapea le galuega paia a le Atua.

O lenei lava taeao lau Afioga i le Fofoga Fetalai, ua ou talitonu na o se taeao o le faafetai. O lea ua taatia nei i lumamea le Tala Faatatau Faaopoopo (Nu.1) o le Tupe mo le 2020/2021. Se ua faamalo saili i lau Afioga i le Minisita o Tupe, lau Afioga i le Minisita o Tupe Maua. E ututi lava lo tatou tamaoaiga i lenei vaitau, aemaise lava o lo o faafeagai tatou ma le Koviti-19, ua afaina ai le tamaoaiga o le lalolagi atoa. Ae peitai, o lo o matauina lava le faaauau pea o galuega masani, malo lava le fai o le faiva. Malo le faatoatoa ma le onosai.

O le tulaga o le tatou faafetauaiga ma atunu i fafo, faafetai tele lava, aua o lo o faapea lava ona faaauau. O i ina e iloa ai o lo o toa pea le faaso. Po o le a le itiiti ma le utiuti o tupe maua, ae tagai pea ina ia aua ne i toa le faamoemoe o Samoa i meataumafa ma mea e atiae ai.

Faafetai i lau Afioga i le Minisita o Tupe Sili, e faigata leaga o oe o le Tama o le Faasalele, ma o le mea foi lea e ao ona le tele sau tala i le Tala o le Tupe, o le faatuatuaga ua ia te oe, faatuatuaga a le Malo, faatuatuaga a le Afioga i le Palemia ua i ou aao, lea ua iloga ua mautu mai. E momoli atu le faafetai. E momoli atu le faafetai i le Afioga i le Ofisa Sili o Pulega o le Matagaluega, le aufaigaluega faapea foi le Ofisa Sili o Pulega o le Magaluega o Tupe Maua ma le aufaigaluega, Matagaluega uma ma Faalapotopotoga Tumaoti sa latou faasaosao ma faaputuputu nai tupe aua le taimi lenei i le faaauauina o tatou galuega, malo lava le fai o le faiva. Malo le tautua malo. Ma e talia ma le

atoatoa e lenei itumalo o Faasaleleaga Nu.2 le tatou Tala Faatatau Faaopoopo (Nu.1) o le Tupe 2020/2021.

Lau Afioga i le Fofoga Fetalai, e fia faaauau lau faafetai i galuega sa faatinoina e lenei Paeaiga, ma e fia faaautu se manatu o lau faafetai i le faaupuga lea o le “tautua faaauau”. O le “tautua faaauau”. O le tautua, o le faavaepapa lea o le soifuaga o le Samoa, tautua leleo, tautua e leai se faamoemoe i se taui. E amata mai lava i le tamaitiiti po o le teineitiiti o lo o tautevateva lana savali i le asu mai o se ipuvai aua le tama po o le tina. Oo atu ua tautua i totolu o Maota o matai, tautu le ava, asu le ipuvai, faaauau i le avea ai ma matai, saofai i totolu o le saofaiga a matai e faia tonu, faia faaiuga, faaiuga lelei, aua le manuia o nuu.

Ou te talitonu, o le tautua faaauau lena. A oo foi i le taimi ua pulapula lagoto le soifua, e le uma le tautua, e le muta le tautua. Aua o le taimi tonu lena e fautua ai, e fesoasoani ma tuualalo ai i ē o le a tulai mai e taitaia aiga, taitaia nuu, faaaoga ai le silafia, faaaoga ai le tomai ma taleni e faaauupegaina ai a o tulai mai i le tofi o le taitai.

O le tautua lea faaauau, ou te lagona o se tulaga lea na tapenaina ai e le Atua Samoa i lana tu ma le aganuu faa-matai ma na Ia faaauupegaina ai le tofamamao ma le faautaga poto, vision and wisdom aua lona Malo lea na valoia e le Tamaitai Tafaifa o Nafanua, ae faatoa toai mai i laufanua o Samoa i le 1830. E oo mai la le Talalelei i Samoa ua mausali le tu ma le aganuu, ua mausali le faa-matai, ua iloa e le Samoa auupega e faia ai lona tofi ma talia ai le Talalelei a le Atua. O a auupega ia? Le tofamamao ma le faautaga poto ae salani i le alofa.

Lau Afioga i le Fofoga Fetalai ma le mamalu o lenei Maota, ua fetaiai nei ni poutu malolosi o lo o faavaeina ai Samoa. 1. O talitonuga faa-Kerisiano. 2. O ta tu ma aganuu faa-Samoa. O le Paeaiga lenei, sa faatino ai ni matatia se 2 e faaauau ai le tautua mo Samoa, sa finagalo i ai Tama ma Tuaa ua faiilagi a latou folauga sa i ai i le Fono Faavae o Samoa, ae sa noanoatia o latou lagona ona o le faamuamua sa ave ina ia tutoatasi Samoa.

O le teuteuga muamua o le Faavae lea na tuuina ai i totolu le Faavae i le Atua Samoa. Sa i fafo o le faavaa, lea ua aumai tonu lava i le mea e tatau ona taatia ai, ina ia aua ai ne i toe maluelue le talitonuga faa-Kerisiano i le Atua o le Tolu Tasi Paia, le Atua le Tama, le Alo ma le Agaga Paia, e faavae ai le taitaiga o Samoa ma le soifuaga o Samoa. 2. Na pasia ai foi Tulafono e 3, Teuteuina ai le Faavae ina ia tutoatasi le Faamasinoga o Fanua ma Suafa e tapue ai ma faatauaina ai tu ma aganuu a Samoa, aemaise lana faa-matai. O ni Tulafono maoae, o ni Tulafono ua faaaliali ai le faataua ma le faamuamua e le Samoa po o le Taitai Samoa o lana tu ma lana aganuu, ma o lo o sosolo pea ia teuteuga i luga o le poutu o lo o faavaeina ai Samoa, o talitonuga faa-Kerisiano ma tu ma aganuu a Samoa.

Ou te avatu ai le agaga faafetai i lau Afioga i le Palemia, le Kapaneta, lau Afioga i le Fofoga Fetalai ma le silia i le 2/3 o le Palestene nei sa pasiaina

nei Tulafono e 3, aemaise le Teuteuina o le Faavae. Ua tatou faaaauauina se tautua na finagalo i ai o tatou tama ma outou tuaa, i lenei vaitau o le tatou Paeaiga. Ma i lea vala lau Afioga i le Fofoga Fetalai, ou te faaleo le agaga faafetai i le Taitai o le Maota, lau Afioga i le Palemia i le tofiaina o au nei, le sui usufono mai Faasaleleaga Nu.2 po o Faasaleleaga Nu.1 Sisifo i lenei foi Paeaiga e le i uma atu. E taitafono i le Komiti faapitoa na iloiloina nei Tulafono. E faatasi ai ma le tofa ia Namulaulu Sami Leota mai Faasaleleaga Nu 2. Le Afioga ia Fuimaono Teo Samuelu o le sui usufono mo Falealii Sasae. Le Afioga ia Leana Posini sui usufono mo Safata Sisifo. E faapea le Afioga i le sui usufono ia Sulamanaia Tauiliili Tuivasa, o le sui usufono mo Vaimauga Sasae. O le tofa ia Ili Taateo, sui usufono mo Aana Alofi Nu 3 ae tainane o le tamaitai sui usufono mai Gagaifomauga Nu 3, le Afioga ia Faaulusau Rosa Stowers.

Sa tofiaina matou, matou te iloiloina ma soalaupule nei Tulafono faatasi ai ma le atunu. Ma tuuina mai ai ni teuteuga e tapue ai ma atili atagia ai le faamuamua ma le faataua e ave i Taitai o Samoa, i ana tu ma ana aganuu, aemaise nei vaitau i le fetuleni mai o talitonuga eseese mai fafo. O se mitamitaga ia i matou ma o matou itumalo, ua matou faaaauauina se tautua mo Samoa. E pei ona taatia mai ai i le 1960 i le Fono Faavae. Faafetai tele i lau Afioga i le Taitai o le Maota mo ia avanoa e le au maua.

E avea ai foi lenei avanoa taua ou te faafetai atu ai i le paia i aiga ma tulatoa o Samoa sa o latou faavanoaina o latou taimi taua, e aumai so latou finagalo, e togiaso ma togi se maa i le fausiaina o nei Tulafono. Ina ia tapueina faaletulafono le tofa mamao ma le faautaga loloto, o lo o latou tausi ai nuu ma afioaga.

Ona toe foi mai ai lea o sau faafetai lau Afioga i le Fofoga Fetalai, i le Taitai o le Malo, o le Kapaneta ma Minisita Lagolago po o le Vaega Faaupufai e Puipua Aia Tatau a tagata, le HRPP. O le tautua faaaauau o fuafuaga sa faataatitia mai i le 1982, ina ua muai tulai mai le HRPP. A lea ua tino, a lea o lo o sapi ai nei Samoa. Aua a toe to manatunatu i na vaitau, ailoga e i ai se isi e toe fia oo i ai.

Sa fai si ou tamai faleoloa, ta te tu lava i taimi uma ta te sau ai i Apia. E fai o le laina o se pusa eleni, a o le laina o se pusamo, ae tasi mea o pepa patuamoa i na vaitau e le o ni pusamo. Ae ua a nei? O lena foi vaitau e na o pisinisi malolosi lava sa mafai ona latou aumaia oloa mai fafo. E le taitai ona mafai e Samoa o lo o tau atiae ma taumafai ona faatino lea tulaga. A lea ua so o se tagata lava e finagalo e aumai sana oloa mai fafo ua mafai. Aisea? O le fuafua lelei, o le totoa foi e fai faaiuga e tatau ona fai. O le lē manumanu i le soifuaga faale-tagata, ae lafoai le soifua aua le tautuina o Samoa. O le agaga faafetai lena lau Afioga i le Palemia ma le Kapaneta faapea foi i Minisita Lagolago, e le ma tau faamalaulaauina a outou galuega, a lea e tautatala mai.

Na saunoa le Afioga i le Palemia e le i leva atu nei, i le taamilosaga ia Samoa, ua leai se aiga e le o tu ai i fafo se taavale. Ua tau le tasi foi se taavale, 2, 3 taavale. O le suiga lena o le tatou olaga o lea ua i ai nei, o se suiga lelei. Ua le ma foi le Samoa e aumai ana avoka, e aumai ana niu, e fola i lumafale, aua ua maua i le agaga atiae. O lea ua galulue faatasi le Malo, ua osi taulaga faatasi le Malo ma tagata Samoa, aua le manuia o Samoa. A o le fatu na toto mai i taumafaiga a le Vaega Faaupufai o le HRPP, ua malo tau malo le tautua Malo, malo le onosai. E na o le Atua na te tauia ia galuega.

E fia faamauina le agaga faafetai i le afifio o Ofisa Sili o Pulega o Matagaluega ma Faalapotopotoga Tumaoti o le Malo, aemaise le aufaigaluega a le Malo. Ua malo le tautua vae, malo le fai o le faiva, o outou lava o le malosi o le Malo, aua o outou tou te faatinoina finagalo o le Malo. Ua faafetai tautua malo, faafetai alofa ia Samoa.

E le galo le agaga faafetai i lau afioga i le Failautusi o le Fono Aoao a Samoa, ma le sui Failautusi faapea le aufaigaluega. O le 5 tausaga e le o se mea puupuu, sa outou onosaia ai foi manaoga o sui mamalu o le Palemene, ae peitai sa outou tali lava. Faafetai tele lava i la outou tautua faamaoni i le faatinoina o outou tofi, faamanuia mai le Atua ia te outou ma o outou aiga.

Lau Afioga i le Fofoga Fetalai, a o le i faaiuina upu a le tamaitai mai Salafai, e toe fia oo lau faafetai i lou itumalo o lo o tapuai mai. Lou itumalo e, ua ou manatua le tala ia Meto le tamaitai mai Amoa, na tagivale e fia fai sona fale, e lauila ae pou i toa. Sa faapea se manaoga na tuuina atu, aua se avanoa ou te tautua ai mo oe lou itumalo. A lea ua ou inu malie, ua ou malie i lau pule to. Ua le tasi ae ua atulasi lau faaaloalo ma lau faaeaea. Ua malie o ua malie malo, faafetai mo lau tapuaiga, a o ou alofaiva e momoli so ta manatu, e fai so ta tautua mo Samoa. O le a se faaletonu, se le atoatoa o le tautua a la outou auaua vaivai, ou te tatalo faamagalo i sou vaivaiga. E poto lava le tautai, ae se lana atu i ama. Ou te faamoemoe i lou titi faitama ma lou agaga malamalamaga e faamagalo ai sou faaletonu. Ou te tatalo foi mo nisi aso, mo nisi avanoa e faaaauai ai pea lau tautua mo lo ta itumalo. E le galo lau faafetai mo ou tina ma tama faaleagaga, ou te talitonu o lo o outou punonou i aso taitasi e talosia le alofaiva o la outou sui usufono. E faafetai tele mo talosaga e lagona le mafanafana, e lagona ai le mafai ona faatino galuega e pei ona tulai mai ai.

Lau Afioga i le Fofoga Fetalai, o le a faaiu se faamatalaga, o lau tala mulimuli, ia alofa le Atua, faamanuia i lau afioga ma ou faiva o lo o totoe.

Faafetai mo lou avanoa.

Na faaalia le agaga fiafia o le Palemene i le patipati o latou aao i le maea ai o le saunoaga a le sui usufono mo Faasaleleaga Nu 1 Sisifo.

FOFOGA FETALAI: Ua malo tulei saunoa i lau Afioga Honourable Gatoloaifaana, o le sui usufono mo Faasaleleaga Nu 1. Ua taliga e fia

faalogologo i lenei taeao, ua e saunoa ua faapena onae ui lava ina puupuu e tusa ai ma lo tatou taimi faatapulaaina, ae ua leai se vailiu e le i oo i ai le lautele ma le loloto o le saunoaga. I le afuafua mai i le amataga, i le taimi foi o lo o faapena ona tausaili manu le Malo e atinae si o tatou atunu u e pei ona e taua. Malo faafetai, malo saunoa e logo i tino matagi lelei i lau tamua. E le tau selu atu aua e te masani i saunoa lau Afioga o le foi sa tofia ma filifilia e le Kapaneta aemaise foi o lenei Palestene, e te taitaifono faatasi ma lou auvaa. E pei ona e malele ma taua o latou suafa, ia tatou Tulafono e le faigofie pei ona faatoa pasia talu ai nei. O le Faavae ma le tulaga i le Faamasinoga, e pei o tulaga lena. Malo faafetai.

E maua le avanoa i lenei taimi, e faagasolo ai le tatou galuega. E manaia foi pe a tulai mai itumalo Faasaleleaga e faaauau o lea ua malele Faasaleleaga Nu 1.

Ou te faasilasila atu foi i le paia o lenei Palestene, o lo o noatia ia le tulaga o isi foi sui usufono. E talu ai o le taofia o alavaa i motu e 2 ia Upolu ma Savaii, ua aafia ai le Afioga ia Tofa Foleni faapea foi le Afioga ia Faaulusau ae faapea foi lou uso a Fofoga Fatalai. Ua noatia ona ua taofia alavaa i le va o motu e 2. Tulai mai se isi sui usufono e saunoa. O lea ua matau atu ua alo mai le sui usufono mo Palauli i Sasae lau Afioga Tuifaasisina Misa, manuia le saunoaga.

Afioga TUIFAASISINA MISA LISATI LELEISIUAO PALEMENE (Palauli Sasae): Lau Afioga i le Fofoga Fatalai o le Maota, faapea sui usufono mamalu uma o lenei Maota, tainane Samoa o faafogafoga mai, e fia muai fai se faamatalaga i le Tala Faaopoopo o le Tupe (Nu 1) 2020/2021 e pei ona taatia i le Laulau a Fono. Ma e lagolagoina e Palauli i Sasae le Tala Faaopoopo o le Tupe 2020/2021. Ma e momoli atu le faamalo ma le faafetai i lau Afioga i le Minisita o Tupe, lau Afioga Sili Epa, le Ofisa Sili o Tupe, malo saili, malo le lufilufi lima lelei mo se lumanai manuia o le tatou atunu. Malo lava le galalue.

Ae o le lauga mulimuli lenei a le tootoo o Vailoa, mo lenei Paeaiga. O le itumalo o Palauli Sasae, aua Faasisina ma sa Lilomaiava, le levaleva ia Safale Letaua ma Palauli na potopoto, o oe o le pule. Ona ou tu lilia lea aua e le faigofie le Maota lenei ma le faafogafoga tapuai mai a Samoa. Ona tulaga faalupe, aemaise o lea ua tuanai atuava ae sina le galu i le tatou malaga i lenei Paeaiga. Ma le tapuaiga a faiva a po fala a Samoa e mamala. Ae ou te talitonu o paia ma mamalu o lenei Maota, faapea le tutafaitoa o le vavaloloa o Samoa, ua maea ona ta tulaga i saunoaga a sui usufono na muai ta seu i le tafaoata o le Fonotaga. Ae leai se malosi, po o se fia atamai, e toe siia se matalalaga pe toe laga tia o le tautiaga, ua taoto fata o upu o lenei Maota. Ae o Samoa foi o le ao e mamalo. Ona ou afe lea, aua ua taoto i le taotoga a ia sa o lenei Maota, taoto foi sa e le mataua, aua le tapuaiga a Samoa i ona ao, uso ma iu. Ua malu tauaso le Maota o Samoa. Ae o le a

tuusao le tala a le tootoo o Vailoa, le paia e o si o ta itumalo, tapuai maia ma le manuia. Se taimi seu silimea le seuga, ona afe atu lea, ae tatalo atu mo au faamanuiaga aua e manuia faiva sii e tapuaia.

Lau Afioga i le Fofoga Fatalai, e le o ni upu e aveane ai, o au le isi sui usufono e faasoesa i Afioga i Minisita o le Kapaneta i manaoga o lenei itumalo. E mafua ai ona ou toe tolaulauina. E le tolaulauina ona o se fia faalalia, ae tolaulau ona o le loto ua tumu i le faafetai. Ona e le i tafao le sui usufono lenei o Palauli, e le i eva foi le sui usufono mo Palauli. Ae sa ou tu i ou faitotoa a outou Afioga i Minisita ma Ofisa Sili o Pulega o Matagaluega aemaise o Faalapotopotoga a le Malo. Ma tuitui, tuitui i le agaga o le faatuatua i le fetalaiga a lo tatou Faaola, tuitui ona tatalaina mai lea. A o nai faamanuiaga nei sa afea ai si ou itumalo. 1. E momoli atu le faafetai i le Minisita o Aoga, lau Afioga Loau Keneti Sio, mo le lagolago sa tuuina mai mo le faleaoga faaitumalo Tulaga Lua i Vaitoomuli. E faafetai i le Malo o Iapani mo le faatupeina o lea galuega. E faafetai foi mo le Malo o Ausetalia mo kesi ma nofoa na faatotoga ai le faleaoga, faapea tusi aoga esese mo le faletusi o le aoga. O lea ua faalelei le ta faleaoga, ma ua molimauina, ua tapuvaetasi i ai mea e fai a aoga Tulaga Lua o lea itu o le motu o Salafai. E fia faamauina le faafetai i lau Afioga i le Minisita o Turisi, lau Afioga Sala Fata Pinati, ma le Ofisa sili o Pulega o le Matagaluega o Turisi faapea le Malo o Niu Sila, mo le toe faaleleia o le mataaga o le Afuaau i Vailoa. O se mataaga ua matauina le fesoasoani malosi i tupe maua ma le atinaeina o le turisi i Savaii.

E fia faamauina foi le faafetai i le Minisita o Galuega, lau Afioga Tapunu Niko Lee Hang, mo le auala galue i Vaitoomuli, o le talosaga vaivai, e fia sosoo atu i uta i le mataaga o le Fetumaa i Vaitoomuli. O lea sa galulue soosoo tauau ai le Afioga ia Leituala Palolu o le sui o le Malo o Vaitoomuli, ma le Komiti faapea le fai faapaaga ma le Iunivesite o Samoa. E fia faamauina foi le faafetai i le Faalapotopotoga o Pulega o le Malosi tau eletise mo le afi moli i Vailoa, lea e maua mai ai le suavai, o le renewable energy mo le faamoemoe o le Malo e ausia matatia ua maea ona faataatitia mo le tausaga e 2025.

E faapitoa le faafetai i lau Afioga i le Minisita o le Soifua Maloloina, lau Afioga Faimalo Kika Stowers ma le Matagaluega o le Soifua Maloloina, faapena foi le faafetai i le Malo o Iapani ma le Malo o Samoa mo le falemai faaitumalo o Satupaitea, o Palauli Sasae ma Palauli le Falefa. O lea e tu nei i pitonuu i Satupaitea. Ua matauina le tele o le faamama avega mo le mamalu o le atunu o nei itumalo e 3. Ae muliai se faafetai o nai ou uso a faipule, le Afioga ia Lautafi Fio Selafi Purcell, sui usufono mo Satupaitea ma le Afioga ia Tiatia Faaolatane Liuga o le sui usufono mo Palauli le Falefa. O nai ou uso a sui usufono ia sa matou galulue faatasi i lenei 5 tausaga mo le faatinoina o lenei atinae. E faafetai mo le lagolago, faafetai mo le faatuatuaga, faafetai mo galuega lelei mo tatou itumalo.

E fia faamauina foi le faafetai i le Malo mo galuega ua maea ona faamaonia mo Palauli Sasae ae le i faatinoina. O le aualagalue i Nuualofa i Vailoa ma le aualagalue ma le taligalu i Faala. E faapea le toe faaleleia o le malaetaalo o le tulagalua i Vaitoomuli ma le malae taalo o le aoga o le Kolisi maualuga i Vailoa, ma le malae taalo fou i Faala.

Lau Afioga i le Fofoga Fetalai ma sui mamalu uma o lenei Maota. Ailoga o manatua e se isi, lau lauga faataupou i le 2016. E lua ni mataupu faapitoa sa ou lagaina, 1. aia tatau toatele ma aia tatau taitoatasi, lua, faamautuina o Samoa o se atunu kerisiano. O le mataupu muamua sa tuuina atu ai se faatupumanatu, e lagolagoina e Palauli Sasae le teuteuga o le Faavae. e mafai ai ona silasila tutusa le Faamasinoga i aia toatele ma aia taitoatasi. E fuafua i le mafuaaga o se finauga, ona o le tulaga ua matauina le faiaina pea o faaiuga ma le faamoemoega o Alii ma Faipule mo le atinae o le toatele, faapea le nonofo lelei ai o afioaga ma le faamasino o isi e finauina le aia tatau e toatasi. O le mataupu lona 2, sa ou fautuaina ai foi le teuteuga ma le faamautuina o Samoa o se atunu kerisiano. Ona o luitau ua matauina e ono manunu ai le Faavae o Samoa o se atunu kerisiano. Ma o le fatu lea ma le faavae papa o le tatou Faavae. Ae faafetai i le taunu mai i le faaiuga o lenei Paeaiga, o lea ua pasia e lenei Maota le teuteuga, ua ogatotonugalemu le Atua i la tatou Tulafono Faavae. O lea foi ua pasia e lenei Maota le teuteuga o le Faavae, ma le faatuina o le Tulafono fou mo Faamasinoga o Fanua ma Suafa. E le gata ua siitia ai le tulaga taualoa o lenei Faamasinoga taua i lo tatou atunu. Ae faapea foi ona amanaia aloaia aia tatau toatele, o lo o soifua le toatele o o tatou tagata nuu ma afioaga.

Lau Afioga i le Fofoga Fetalai, o io ia o le tatou galuega i lenei Paeaiga. E le ni tamai io, o io lava o le tofa mamao ma le faautaga loloto. O ni io e mafai ona ou faapea atu, o ai lava ia o lou sao i totolu o lenei Maota. Ae le selu atu le Faigamalo, ae i ai le faaupuga faa-Peretania, na ou faalogo i ai e faapea, “comes the man, comes the time, comes the man.” E faapea le faasamoaa, “e sau le taimi e sau foi ma le tagata o le taimi, e pei o se upu faamalosiau. O le a foi le taupale o vaalealea i nisi o taimi, pe a soua le malaga, e aumai e le Atua le tagata o lea taimi, ma lea vaitau e tali i luitau.

Lau Afioga i le Palemia, Tuilaepa Dr Sailele Malielegaoi, e le selu atu Palauli Sasae, a o le tagata ma lona taimi, o le tagata foi ma lona valaauiina. Ae o le tali atu ma le loto tele ma le tumau i le finafinau mo mea lelei silisili, e iloa ai le tagata toa, o le tagata o le taimi, faamalo faafetai.

Lau Afioga i le Fofoga Fetalai, Leaupepe Toleafoa Faafisi, le paia o le Kapaneta faapea sui mamalu o lenei Maota. E mafai foi ona tatou faapea ane, o tatou lava foi o tagata o lenei taimi. Pe a fua i matatia ausia gata na mafai ona tatou faia i lenei Paeaiga ua faamuamua le Atua, ma ua faataua a tatou Tu ma Aganuu. O le fatu lea o so o se tagata Samoa moni. Lau Afioga i le Fofoga Fetalai, so o se folaua lava e taumuli i le ava, o fea e taoto ai le

naunau ma le taunuuga ae taumulimuli i talosaga. E faanonomanu ae a le tapuaiga ma le faanonomanu i le faamoemoe e afua ai le agaga faafetai.

Si ou itumalo pele o Palauli Sasae, e mumu ola i lou loto lou alofa ma lau faaaloalo. A o ai le tagata ma le atalii o le tagata ua outou alolofa mai ai. O le upu o le loto malie, ua tomalie manu o le tai, ae ae malie faiva o le auauna ona o la outou tapuaiga. Ua mana la outou tatalo, na fofoga foi lo tatou Atua i la outou tatalo. O le loto ua tumu, faafetai, faafetai faafetai tele lava.

Ona ou afe mai lea i si ou nuu o Vaitoomuli, faafetai tapuai, faamalo i lau susuga Fereti Sefo ma le faletua, le faafeagaiga EFKS faapea lau susuga Alosio ma le faletua faafeagaiga Katoliko, le susuga ia Pagamaalii ma le faletua faifeau o le Manumalo. E faapea lau susuga Vaifoa ma le faletua, o le epikopo o le Ualota i Vaitoomuli. E faapena foi ona faafetai ma faamalo i le tapuaiga a tapaau, le alo o Lilomaiava le Faasisina ma Niupulusu, le aloalii faapea tulafale alii ia Fiso ma Seumanufagai ma le levaleva ia Safaleletaaua. Si ou nuu o Faala, faafetai tapuai, faamalo tatalo i lau susuga Uili Konelio ma le faletua, faafeagaiga EFKS faapea le susuga ia Pauulu ma le faletua o le fesoasoani Katoliko. O le Susuga ia Iaulualo ma le faletua, o le Epikopo o le Ualota a Faala 1.

E fia faaleoina foi le faafetai i lau Susuga Ah Chong ma le faletua, o le Epikopo a le ualota a Faala 2. E faafetai foi i le Faifeau Aso Fitu i Faala. E faapena foi ona faafetai ma faamalo i le tapuaiga a le Alo o Lilomaiava, Sa Laulū ma le Matua ia Tauvao Fuiavailiili ma Afoa Fouvale, faapea le Sao Fetalai ia Lagaaia ma le uso taua, o Tui ma Tapusoa ma le Tofa a Manusina. Faafetai tapuai faamalo tatalo i lau Susuga Iosua ma le faletua, le Ekalesia Assembly of God. Faafetai i lau Afioga a Patele Manuele Vito, le Sui Epikopo o Savaii, Patele Paulo Afamasaga faapea lau Susuga Teofilo ma le faletua, Fesoasoani Katoliko. Faafetai i le Susuga ia Taki ma le faletua, Faifeau Penetekoso. Faafetai i le Aoao ia Letaulau Mataafa Esau ma le faletua o le Ekalesia Faapotopotoga Kerisiano i Vailoa.

E faapena foi le faafetai ma le faamalo i le tapuaiga a Faasisina ma Aloalii, le Fofoga o Lilomaiava faapea le Faleao ma Saletaulua, Toluono ma le aiga Falelima, le tapuaiga i le Nofoalii, le Tofa ia Savea ma Lemoa, Tui, Misa ma Ulumea. Le tapuaiga i le Matua le Tofa Mai ma Latu ma upu ia oe Palauli. Palauli, e iloga oe i le nofo a Pule ma le va faafeagai ai ma Tumua, aua e te toala faaautama e afua ai gafa i Tama a Aiga uma o Samoa ma lou gafa ua soo ai Samoa, ma ou vaipapa na susua ma tutupu mai ai toa o Samoa. Faafetai faaaloalo, faafetai faaeaea, faafetai faafetai tele lava.

Lou itumalo pele, ua malama i ulugalu se vaivai e fia auauna pea mo oe le itumalo pele e afua ai ona foutafili le agavao, o le tatalo foi i le Atua ina ia faaauau Lana valaau ma faaaogaina ina ia tauaogaina le ola ma le malosi mo Lona viiga. Ou te le fatamoesuati pe ou te fatamoetaale, a o fea o i ai le tofa ma le moe, e augofie le auauna e fai lou finagalo, ma o lo o maua pea le malosi i le fesoasoani mai o le Matai. Ou te le ulutoaina foi le tofa ma le

moe, ae tatalo, tatou taufai tatalo ina ia pule mai le Matai oi le lag i la tatou tofi i le faiga filifiliga a le tatou atunuu o lo o loma nei. O le tatalo, ia i ai le manuia o le Atua i lo tatou itumalo mai lava i e ana tofiga ma valaauiina, seja oo i le sila talimatagi mo le lumana. Ia manuia mea uma tatou te fai ma mea uma tatou te faasagasaga i ai, a o ia mea uma, ia malie ai le ola ma le soifua silafaga i le tatou Matai ma iu i ai Lona viiga.

Lau Afioga i le Fofoga Fetalai, faamalo faafetai i ou faiva tu i le foe ma sa too i ai le sa folau o Samoa i lenei Paeaiga, ua toe o se aga ona faaiu lea. Ae manuia tele lou malolo manumalo mai ou tiute faale-Malo i tausaga e tele sa e tautua ai, tau ina agalelei le Alii i le malosi ma le maloloina, faapea foi le faletua ma le aiga.

Lau Afioga Tuitama, lau Afioga Aeau, lau Tofa Faasootauloa, lau Susuga Mulpola, faamalo le tofa faatamalii, manuia foi la outou malolo manumalo mai faiva sa feagai ai i le Malo ma lenei Maota.

Lau Afioga i le Taitai Tuilaepa Dr. Sailele Malielegaoi, e le i te i tula faatali Salevalasi ia Fatialofa ma Auelua, tatalo mo le malosi ma le maloloina o lau Afioga faapea le faletua.

Sui usufono mamalu o lenei Maota, e manatu foi i le tatalo a Palauli Sasae i a outou Afioga faapea nai aiga. Le tapuaiga mamala a Samoa mai lava i Lana Afioga Mamalu Le Ao o le Malo ma le Masiofo, paia faalupe i so o se tafa, mai pulega ma puleaga a le fanau, o le tatalo a Tuifaasisina Misa Fuiavailiili Lisati, ia i ai le manuia o le Atua i o outou pa, ia faapea ona folau i lagima le sa o Samoa i lenei tausaga ma e lua.

Manuia tele Ofisa Sili o Pulega o Matagaluega ma Faalapotopotoga a le Malo o lo o tua i ai le tofa a le Malo, alofagia le nofo tuavae o le Failautusi o le Fono lau Afioga Tiatia Graeme Tualaulelei ma le aufaigaluega a le Palemene. Soifua ma ia manuia.

Na faaalia le agaga fiafia o le Palemene i le patipati o latou aao i le maea ai o le saunoaga a le sui usufono mo Palauli Sasae.

FOFOGA FETALAI: Malo faafetai. Ia, ua ou manatu o lele ua tu vaga i figota ae olioli livaliva, ia ma pepese fiafia le faafofoga tapuai mai a le itumalo o Palauli. E i ai le manatu e pei o le talitonuga o le au kerisiano, afai e faatu e le Atua le tagata, seiloga lava e finagalo le Atua e toe aveese, ioe. Pei o le talitonuga lena o le au kerisiano ma i latou e amiontonu. E faapena foi se lagona i le saunoaga, e leai, e le laeia, ae pei o se ie e folasia i malae i le faafofoga mai a le itumalo. Palauli o lena ua outou faafofoga, ia agalelei le Atua i le faamoemoe ina ia faapena ona pau se toa, ae toe tulai mai foi le toa. E faapena. E i ai le manatu e le selu atu i le saunoaga a le sui usufono mamalu. Ia o ou mama na, e faamoemoe i le Atua e toe faafoi mai e le Atua e ala i le faiga palota lau Afioga i totonu o le Palemene, aua nisi mea o lo o faaleleia.

Ia, o lea lava e tele le tatou taimi mo se isi sui usufono e fia saunoa. E ese le manaia o saunoaga a sui usufono ia faatoa uma atu nei. E matau atu e pei e tau foufougata mai le sui usufono mo Aleipata. Ia...

Ia, tulai mai le Afioga i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fatalai e te silasila mai o lea e saofafai atu le Kapaneta, ua leva ona fia tali atu ae faigata foi le avafatafata, ona masalo pau lava lenei o le Palemene o Samoa e ese ai ma le tele o Palemene a Malo o le Taupulega. E i ai le tusi mafafia lava toeitiiti atoa le 8 inisi e masani ona laulau mai e isi foi Fofoga Fatalai, o lena ou te vaai atu e te le o faaaogaina. A o le tusi lena o lo o faataoto mai ai le faagasologa o taualumaga a Palemene uma lava o le Commonwealth. Ae ese ai lava le tatou Palemene, e lualuagia lava ma le avafatafata, aemaise le tulaga foi o le va faatamalii o lo o faaauau mai lava i totonu o le Palemene lenei.

O le ala foi la lena o lo o tele lava le tofa fatalai i Afioga i Minisita i le matou faatalitali atu se i maea lelei saunoaga a sui usufono, ona toe pau lenei o le Fono ona uma foi lea o le Paeaiga lenei, a o lo o matau o lo o taumafai lava sui usufono i nai aso o lo o totoe e faaauau pea le latou tautua ma le latou sao e tusa ai ma le tautoga o le faamaoni.

O lea la, ona o le ta avega e felagolagomai, o au nei o le Taitai o le Maota ou te lagolago atu foi i lau avega, ia, o ni a fa lau Afioga, o le ua toe 2 minute fai le tatou vaivevela, ae a pe a malie ia lou finagalo ae tatou malolo i lea 2 minute ae tuu atu le avanoa e toe matimati ai saunoaga a sui usufono o lo o foufou mai. Ia o sau tuualalo lea lau Afioga.

FOFOGA FETALAI: Faafetai. Masalo e manaia le lagolagosua a le Taitai o le Maota i le galuega a le Fofoga Fatalai. E pau o le popolega sa manatu ai e tapa se sui usufono tatou te foi mai ona amata ai lea pe a tatou taliu mai le tatou galuega.

O le popolega lau Afioga i le taimi sa e toesea ai i le tulaga o fonotaga foi faava-o-Malo i fafo, sa tulai mai se tasi o Minisita ma talosaga mai i le Nofoa, pe a pe a se i faasolo Minisita i saunoaga foi nei faalauaitele. Ia, e pei o le popolega lena, ua ou vaai atu foi pei a toe tau tulai mai foi le Minisita lava lea e talosaga mai e fia saunoa faalauaitele i se taimi lea ona saunoa faa-Minisita lea. Sa ou talosaga i ai e le talafeagai ona e le talafeagai ma le tusi tele lea samasama pei ona e taua. O lea la, o le a... ia, alolofa sui usufono, a tatou taliu mai i le tatou malologa ona tatou faasolo loa lea leaga ne i te i foi ua... aua afai e talosaga soo mai Minisita, ia e iu loa ina tuu i ai le avanoa ma tapuai loa lea o sui usufono ae faasolo loa lea o Minisita i a latou saunoaga faalauaitele, aua e ui lava ina sa i le Tulafono, ae taga lava i le tatou vafealoaloai.

Ia o le mea lea, o le a faataatiae Galuega a le Fono Aoao Faitulafono mo lana malologa masani.

Na faataatiae Taualumaga a le Fono Aoao Faitulafono mo lana malologa masani i le itula e 10:38 i le taeao ma toe faaaauau i le itula e 11:33 i le taeao.

Na toe faaaauau felafolafoaiga i luga o le faiotauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasila sila atu ua toe amatalia Taualumaga ma Galuega a le Fono Aoao Faitulafono.

Faafetai ua toe maua se isi faaopoopoga o le malosi o sui usufono mamalu o le Palemene ma le Taitai o le Malo e faaaauau ai le tatou galuega. Ia, atonu ua tapena se isi sui usufono e faaaauau le saunoaga e tusa ai o le tatou galuega.

Ia, tulai maia le sui usufono mo Anoamaa Sasae, lau Afioga i le Uipi o le Palemene, lau Susuga Lufilufi. Tulai maia e faaaauau le saunoaga.

Afioga ALAIASA MUAGUTUTI'A MOEFAAUOUO MALAGAITUTOGIAI SEPULONA MOANANU (Anoamaa Sasae): Faafetai i le avanoa ua tuuina mai e lau Afioga i le Fofoga Fetalai, o lea foi ua sao i alo le taliga o le sua ma le faamalositino a le paia o le Palemene ma le tatou Fonousu, ua maua se faasiliga malosi e faaaauau ai le tatou galuega. Ua ou matau lava i le faagasologa o le tatou Fonotaga mai lena la vaiaso, tatou te faafetaia le alofa o le Atua ua momoli mai lo outou soifua ma so matou ola i lenei taeao fou. Ia, e taga eseese foi lava famoemoega o malelega ma saunoaga ma fetalaiuga ua pauu i totonus o le Maota, o le faailoga lea o le oa o le tamaoaiga o le Atua ua faasoa i sui usufono mamalu o le tatou Maota.

Ae ia te au foi le ava ma le migao ou te solituina ai le paia o le Maota o Samoa i lau Afioga i le Fofoga Fetalai faapea foi le paia o lenei Maota. Ae a le faafogofa tapuai a lo tatou atunuu mai tafa e fia. Ua taua foi e nisi o sui usufono malae o le nuu nei, o le Amouta ma le Amotai. Ae o le mea e fia faailoa i le tatou Maota, i le va lea, e le faigofie, ioe. Fai mai a oo ina taaalo toa ona fata lea o toa leaga e i ai le mea e tau o le vaimagotogoto e seasea se isi sao i ai. A maea la le faamoemoe i le Amotai, ona faaiu lea i le malae i Moamoa. Ia, a vevela le faamoemoe ua afaina soifua o toa, ia ona lafo lea i le vai o le Tafaaola. O i ina e saili malosi i ai toa o le taaloga. Ia ua manino le tala malamalama, o i na to ai malo, o i na to ai manu.

Ia, o le lauga foi a lenei nuu, fai mai e 2 ao 2 po, ioe. O le lauga fai mai na ola ai le Fale Tuamasaga. Ae ui i lea, e i ai lo matou manatu, o le tofa a aiga,

e le faasaua i le ala, o le tofa fai mai a oo ina sasau, e oti ai le tagata, e ola ai le pagota. E le sii soo foi. O le faautaga foi i Tumua, e i ai le manatu e le taea le lavelave o le faamoemoe, e tuusao se faamoemoe o le Tumua, pe tasi lava pe 2, a o le lauga a le Tumua e faalogo i ai Samoa.

Ona i ai lea o le matou talitonuga i lenei taeao, maeu le alofa o le Atua i si o tatou atunu, maeu Lona agalelei ua taitai mai ai Samoa i lenei mamao. Ua tuanai atu atuvasa i lena tausaga 2020 e le faigofie, tatou lutia i Puava, a o lea ua tatou mapu mai i Fagalele i lenei taeao. Ona aisea? O Lona alofa ma Lona agalelei. O upu lava a le Fai Salamo, le Tusi a le Salamo 33, a o lona fuaiupu 12 fai mai; "Amuia se atunu e fai le Alii ma ona Atua, e fai ona tagata ma ona tofi. Blessed is a nation who makes the Lord that God, its people and its inheritance." A lea ua tatou sapi ai? Ua sausaunoa nisi fai mai ua tuu i totonu o le Faavae, ua papa ai le fali, aua o le Atua o le Faavae Papa. E leai foi se naunautaiga o le sui usufono e tatou te ta i tua ma tau tolaulau, o a galuega sa fai, o a mea sa tatou mafai ona faatino. Leaga fai mai lava le upu, a maea ona tatou faia se galuega, o tatou lava na o ni auaua le aoga, faatauvaa, a ia faafoi le viiga i le Atua. E pau lava foi la le pese na ou fia pese ai i lenei taeao, avatu ia le viiga i le Atua. E i ai le pese lena e masani ona pepese ai le au kerisiano, ae o le a ou le pese e pei o isi tootoo ia na pepese, ne i faitauina. Ia, a ua faitioina foi e nisi le faamoemoe o le au pepese, ia ae taga eseese. O le mea lea e manaia ai le Maota o Samoa, e le tutusa uma tagata, ae ua avea le tatou feeseseaiga, o tatou uiga ma tatou manatu e fai ma aoaoga ma luitau i lo matou ola, leaga e eseese le fausaga na fausia ai tatou e le Atua. A tutusa uma, ia, ua faaletonu le lalolagi. Ae faafetai.

Ou te manatu o lea o le a... e lavelave lava le laveloa o upega fetalai o le atunu, o nisi ua taotao popololoa, a o nisi ua tata faatili i le aloalo e pei o le faiva o tautai. O lele foi ua silasaaga le seuga tautaialii o le vao, aua ua matalupe le fogatia, o lupe sa i toaga o mauga ma ifo to i vanu, lele ua faaoloimaau i Tiafau i lenei taeao.

Ae ou te le i asaasaina la le vaofilifili na i le tuamafa ma le tualoto e pei o le upu i le ausaga nai Fitiuta, pe matou te vaisausauina Tapuitea ma sama le salefu nai le vai o tausala, aua o lea ua matala ia Segatupapa nai le ana. Ae matou te le i paia le vai na momoo i ai le Tuiatua nai Mulinuu ma Sepolataemo i tamaitai o Fuatino ma Melegalenuu, o upu lava e fai i le Tuiatua, a le sii se vae pe sii se lima, a le faia se tala, e ao lava ona e faatulou, e pei o le tala ia Matautia faatulou. Ona matou faapea lea, tulou ia ou pa le solo ma ou pa tuloto, tulouna ou galu e fia ma ou auma sa, tulouna ou matagi oo ma ou matagi moliao. Tulouna ou lama sa ma ou lama avea leaga o lele ua faafesagai ulumanu, e pei o le upu e fai i le lagimalofie. Tulouna ou matagi agi pisaga e te tiu malu ai, tulou, tulou, tulouna lava. O ou savili mai Agaae seia paia Agaifo, aua ou paia faalupe Samoa.

Tulou le faafogofaga tapuai a le Motusa aua le Laau na Amotasi, Faatui o le Motu, Tootoo o le Faleula. Tulou le afio o Sua ma Vaifanua, Fofo ma

Aitulagi, Ituau ma Alataua, Saole ma Saleaaumua ma le Launiu na Saelua. O paia na o le Faleagaafulu.

Ia, tulou foi le paia o Aiga ma Tama, o Tama ma Aiga, le usoga ia Tumua ma Pule, Ituau ma Alataua, Aiga i le Tai ma le Vaa o Fonoti. Tulouna ia le fanua ma lona tapuafanua. O Tiafau o le malae o le Faautugatagi a Tumua ma Pule, o le malae o le tagamanu a Samoa, fai mai ua tatanu ai upu ae fotuai ai Malo, o lele ua fusi le fau o Malo i le malae i Tiafau. Ona i ai lea o le manatu, o paia o Lalogaufuafua e tausi e Lufilufi, o Malie ma le Vaitoelau aua Fata ma Maulolo ma Tuisamau, o le paia i Maauga ma Nuuausala e tausi e le Matuanatogi ma Leulumoega, o lea ua tini tauao i Tiafau i lenei taeao.

Ae a le paia o Fufifatu, o Tuilagi ma Namulauulu, le paia o Vaituutuu lau fetalaiga Saleaula, le paia o le Alii o le Itu ma le malae i Finao, Matia ma Matia Ituau, e afio ai Aiga ma Salafai ma le Fale Vaisigano. Le paia ia te oe Vailoa, Faasisina ma Sa Lilomaiava ma oe le Pule Palauli, paia i le Faletoi aua Asiata o le Vaiti ma le Vaimalae ma le mamalu o le Alataua, o lea ua tini tauao i le malae i Tiafau, aua ua Fonousu tupu ma tamalii ma tootooau o le atunu. Tulou, tulou, tulouna lava.

Ia, lau Afioga i le Fofoga Fetalai, o upu lava a le atunu ua masani ai, a lafalafa a tuna, fai mai ua ao paga ia Sa Tupua ma Sa Malietoa, ae ulugafa ai le Tuiatua, ua tino e tasi tatou, ua tino ua toto, o Samoa o le aiga. O le ala lea o le matou faaoloolomaau i lenei taeao, leaga e tasi lo tatou aluga e tasi lo tatou ieafu.

Lau Afioga i le Fofoga Fetalai, ae ou te le i oo lava i ooooga o le lauga, ia, e faigata o lele ua gau le poutu o le fale o Samoa, le tuua o le Malo e se tasi o uso sa tatou nutimea faatasi, ua tuumalo le Afioga i le Taulagi le Afioga ia Vaafusuaga. Ua masaesae le lagi, tulou, ua gauolosaa i le Matua o Sa Tuala, ua gau foi le tootoo o Maauga, ua solo le fue i le nofo a ituaiga ia Leulumoega. O le uso sa tatou galulue, ia, e faatulou i le itumalo o Sa Tuala ma Sa Tuisavailuu, ioe. Faamaise i le afioaga, faamaise i le faletua ma le nofo a alo, aemaise o aiga e fia, o e tau i le Afioga i le... A lafalafa foi gafa, leai o le totoo lava lea o le vaaloa i le tina o Tupua aua lenei itu o le atunu. Ioe. Talosia ia ia tafimala le malaga ma maua sona nofoaga i le ola e faavavau.

Ia, o si au saafiafiga i si uso: Talofa Vaafusuaga. O lea ua alu lau malaga. Ae le galo oe uso i le agaga. O lou tausaafia ma lou tauagafau. E le galo i le mafaufau. O a tatou toleniga i le taeao i le auala. E faagalagata leaga e te faia uma tatou tala. Ia, e ui ina tatou le i faatofa. Ae ua faia lava le finagalo o le Atua le Tama. Ia manuia lau malaga oe le Taulagi. Ia tatou feiloai i se aso i le lagi. Ia, ua aoao mai foi tatou, se e fai a le moto e fati foi le matua, e toli lava le moemoe, e toli foi le lau pula. Tatou... e lelei ona sau le valaau a ua tatou tapena. E tasi lava le auala i le lagi ua faasino mai, na o Iesu Keriso, fai mai “o Au le Ala, o le Upu moni ma le Ola”, ioe. O le ki lea o le Malo. A tatou talia, aua e faivavale lava nei mau mea tatou te pisi ai, ioe. O

le a le aoga? Ia e alu lava ae tuu. A o la e faatalitali mai lo tatou Atua, fai mai ulufale maia i le fiafia o lou Alii, praise the Lord, Amen.

Ia, e pei ona malie i lau Afioga, ia e faatulou i le tapuaiga a le aufaigaluega totofi a le Atua i fatafaitaulaga e fia, malo tatalo. E faatulou foi i le paia o le tatou Malo, lau tapuaiga Le Ao Mamalu o le Malo ma le Sui o le Fono a Sui Tofia. Ia, lau Afioga i le Palemia ma le Kapaneta, lau Afioga i le Fofoga Fetalai faapea le tatou Maota.

E faapea foi le tapuaiga a le Faamasinoga, Ofisa Sili o Pulega o Matagaluega ma le Malo o Samoa. Malo galulue, faafetai.

Ia, e pei lava ona malie, o taeao faapenei, o lea ua tatou i luga o le gaga, ua lata foi ona maea le tatou faamoemoe. Ia e leai lava se isi mea na o le agaga faafetai. Leaga e i ai e na faamalolo e le Alii, e toa-sefulu ae toa-tasi lava na toe foi. Ioe, fai le faafetai. O i foi tatou te iloa ai e taua i luma o le Atua le agaga faafetai. Faafetai i le Atua i lenei mamao, ia e le i see lelei le tatou sa, o lea lava ua tatou vaai i fetuatuanaiga, ua afua ai ona tulai mai nisi o feeseseaiga i le Maota. Ia, a o le faiga lava lea e le moemoenoa le laufaleaina, e le moe le fili e osofaia lo outou soifua ma lo tatou ola. O le tala a Lufilufi, fai malu faiva, fai malu faiva. Ia tatou vaavaai ma tatou alo malie le tatou faamoemoe. E pei ona ou fai atu, o Samoa o le aiga.

Ia, e fia momoli sau faafetai i itu e fia o le tatou Malo o e sa tautua ma auauna ma faatino faamoemoega. O le sui usufono lava ia na o le tatalo, tatalo, tatalo, a o le pule e to mai ua faamanuiaina ai Samoa faapea foi lenei itumalo. E le tau tolauauina, o la e matau le itumalo ma nuu, aua o le fesili lava lea. E i ai ni ai o lou faiva? O fea sa e fagota ai? O le a sau mea sa fai? O le tali o lena e ia te outou, a o le faafetai e faafetai i le Atua ona ua tatala avanoa. O le mea lea lo tatou itumalo ma Samoa ua potopoto, o le faiva o tatou o le tatalo mo feau ma tiute ua feagai ai ma le Malo, aemaise o le Kapaneta ma i latou o lo o tu i le foe. E faafetai mo galuega tetele, aualagalue, talivai, o le vai paipa, taligalu, e le taugofie nei mea. Ia faafogafoga mai outou Samoa, e uma lava lea galuega ma umusa e fia miliona. E 2 miliona ma ona tupu, ae faafetai i le Atua i lana faasoa ma lana foai ua faaoaina ai lo tatou Malo i ia tiute ma ia faiva.

E i ai mea na ou fia faafetaia ai lau Afioga ne i galo, o le tatou Matagaluega o Soifua Maloloina ona o le puipuiga, o lea foi e i ai la tatou Komiti. E faafetai i le puipuiga o lo tatou atunu. Ua logologoa le tala i le lalolagi, o Samoa o lea e faasaoina mai nei faamai, faafetai tele. Aua foi tatou te naunau i le ufi, ae ia tatou manumanu i lo tatou ola maloloina. Ua toatele tagata ua ou faalogo ua fia o mai, fia asiiasi mai. A o le agaga lea, e toaititi lo tatou atunu, tatou te fiu foi e faasa potopotoga, ae leaga o le agaga lea o tatou o Samoa e soosootauau e osiosi aiga. O le ala lea a tatou taofia mea ia, ua faasaoina foi le soifua o e o lo o i totonu o si o tatou atunu. Ua faafetai tele i lau Afioga i le Minisita, ia faamanuia le Atua.

O lea foi ua manino auofala i le atunu, i le tulaga ua i ai le aoaoina ma aoaoga. Ua aooga fua le atunu, faamanuiaga sa le maua i o tatou vaitaimi, sa tatou tau o i tuuaga e saili pili i nisi tagata ma faigaluega e maua ai ni tatou pili. A o lenei vaitau, i le tofa mamao a le Malo, ia faapena ona maua e alo ma fanau le avanoa e aoaoga ai, e ala i taumafaiga a lo tatou Malo. O outou foi matua, o le faigofie ia o le mea o le sai ma le faitio, ae e le faigofie, taumafaiga a le Malo e saili seleni aua le faamoemoe o alo ma fanau ia faapena ona manuia. O lea e faafogoa mai ia...atonu lava o faafogoa mai o tatou alo ma fanau o lo o gapatia i galuega faavaitaimi. Ou te faafetai atu, e fai foi ma sui o lo matou itumalo i la outou galuega. E leai ua ea ma ua maua lo outou ai, aua lo outou tautua, malo ua tatala avanoa a o outou e faatino galuega. Ia tautuana ia tauleleia lo tatou atunu, a o outou alofaiva. Ma o le mea lava e mautinoa lau Afioga, e tele ia o le sao o nei mea, ma le faamanuiaina o nei mea i totonu o le Tala o le Tupe ma le tamaoaiga o Samoa. Ioe, o nei lava i le faaiuga o le tausaga ua sioki mea fau fale. Ua ta fealualuai atu ua leai ni laupapa, aisea? Ua atiae le atunu, e ui lava ina tatou feagai ma faamai, ae ese le alualu i luma o le atinae o Samoa. Ua faamalo faafetai galulue. O lea ua uma ona timai Taitai o lo tatou atunu, ia tautuana ia amio tausaafia, amio lelei aua lo tatou va ma isi atunu.

E faafetai ia tatou paaga, e fia faafetaia lava e lenei itumalo, tatou development partners. E le galo lo outou agalelei, la outou fesoasoani ia Samoa ma lona atinae. E leai se mea tatou te mafaia pe ana le tuutuu mai tauau o Malo, o e agalelei ma alolofa mai, ua mafai ai ona faatino a tatou atinae. Ia faaaauau pea, tatou faiga lelei ma faiga paaga ma nei Malo. O la matou tatalo, ia faamanuia le Atua ia te outou, ma lo outou agalelei.

E tatau ona ou faafetaia le Pulega a Alii ma Faipule o nuu taitasi ma afioaga ona o lo outou sao, ua le nofo lelei o Samoa. Se o le tautua tuavae lava ia a le Samoa, e amata mai i le tunoa, ona sau lea i le faleoo ae faaiu i le faletele, o le tautua lena. Afai e te fia alu atu lava e alu i le faletele, ua misi e lou olaga aga o le tunoa ma aga a le fale...leaga o le tele lea e i ai, o le tautua fiamatai. A e nofo i le fale o le matai, e amanaia sau tala, e amanaia sou leo, leaga na e ui mai i mea ia. O le mea lea, e momoli atu le matou faafetai tele, le tofa, le faautautaga, lele ua malu Samoa. E le lava a tatou leoleo, e le taitai ona lava, a tuu atu foi i tatou leoleo o malu a le Malo se i tulou, e le faaaupegaina. Ae faaaupega i le vafealoai, faamoemoe i le Agaga o le Atua e maua ai le filemu. Ia faaaauau lo outou tiute, aua ne i outou faatupu se vevesi i lo tatou atunu, leai o le tofa lena e malu ai Samoa. Faafetai tele ona o la outou auaunaga.

FOFOGA FETALAI: Ia malie le sui usufono se i tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, na le fia faalavelave i le saunoaga a le sui usufono, ae ona o le taua tele o vaega ia ua oo i ai lana saunoaga. Ae lelei ona ou tulai atu e faamalamalama se vaega taua lea ua oo i ai, ma nai vaega ia i tua atu.

O le tulaga lea i a tatou leoleo, o lea e tau tomanatu nei, pe ua lalata i le 700 pe sili atu foi a tatou leoleo. E le mafai ona lava leoleo nei, ia aofia uma le atunuu atoa i taimi e fofo ai faalavelave e tulai mai. O le mafuaaga foi lea e faatutu ai a tatou pou faapitoa, po o Ofisa ia o Leoleo, ua faatuina i nisi o afioaga i tua. Ona faafaigofie ai lea ona faatino le latou galuega, o lea e tu lata atu isi ofisa ia, e oo lava foi i totonu o le taulaga. E i ai foi le pou lea e i i Aleipata i Lalomanu, ma faasolosolo ai i le atu Safata. E oo lava foi i totonu o Apia, e i ai foi le pou lea e i Tuanaimato. A o le aoga o pou nei, ia vave ona oo atu alii leoleo, i so o se taimi o le aso ma so o se taimi o le po. E faaaupegaina ai foi a latou taavale mo le fofo o faafitauli, ae le mafai le mafai ona lava.

E oo foi la i Savaii, o le ala foi lena o lea o lo o taoto le faamoemoe o le Malo e toe faatele le Matagaluega lea e i Savaii. Ma o le taua o le faatulagaga, o le toe tilotilo lelei, po o talafeagai Tuasivi, pe le tatau loa ona faatuina aloaia i eleele tu taulaga ia mo Savaii i Salelologa. O lea ua i ai eleele tetele o le Malo i ina ma fausia ai loa fale, e le gata i lena o le falemai. O le taua o le itu lea, ona o i o le toaiga o sasae ma sisifo. O mea taua uma ia mo le agai atu i le lumanai e oo i ai fuafuaga mamao o le tatou Malo. E faigofie foi mo tagata i lo le omai tau mai, o pasi e nonofo i Salelologa, ae toe pue pasi e toe o ai i o i Tuasivi, toe o ai i o i le Ofisa o Leoleo. O mea ia o lo o ola pea i mafaufauga mo le vaai atu i le lumanai. Aua o so o se Malo magafagafa, e le mafai ona nofonofo i se mea e tasi. E tatau ona vaavaai ma vaavaai pea, i le mafai ona tali atu ia le Malo i faafitauli, o lo o tulai mai i nuu i tua. Aisea? Ona o le faaoaloataua pea o augatupulaga, o le ala lena e taua tele ai le tulaga lenei o le malu o le puipuiga a Alii ma Faipule. E faaoaloataua pea i aso nei, i le tele o fesootaiga televavave i telefoni, faapea foi i ualesi televavae, vaai i TV, sau ai ma uiga le mafaufau sei tulou le Maota lenei. O uiga faa-fafo, aemaise foi pe a tausolomua foi i nisi ua matutua o le atunuu, ona talaiina. O le tulaga la lena e taua tele ai le Pulega mamalu a Alii ma Faipule. E faalagolago i ai ia leoleo. E taua tele, aisea? O Pulega mamalu a Alii ma Faipule Faletua ma Tausi, e mafai ona faaupu faapea, o i latou uma lava o leoleo. O Pulega mamalu o latou uma o leoleo, e taumafai ina ia taofiofi le amioleaga, le moemoenoa ma le laufaleaina. Ma uiga ia ua tutupu mai, i le tagofia o mariuana ma fualau faasaina, aemaise le matautia o le mea lea o le ice. O le tulaga lena ua ese, le lalolagi lea ua tatou ola ai, ua tatou ola i le tulaga ua faigofie ona mataitu, matamata atu i mea la e fai i fafo. O mea la e fai i fafo e Malo, e leai ni latou Pulega mamalu a Alii ma Faipule. E faatupu vevesi, ua oo lava i Maota o latou foi Palestene,

ua osofaia, ua osofaia e le pulega lea malosi. O le talitonuga, o le saolotoga o le tagata, o le talitonuga taitoatasi. E leai ni a latou Pulega mamalu a Alii ma Faipule, e taua ai le aia toatele. E le gata i Pulega mamalu a Alii ma Faipule, a o le aia a Faalapotopotoga a Ekalesia, e taofiofi ai le amioleaga, ma uiga ia e faatuala i le pule. O le faatuala i le pule, latou te faatupu ai le vevesi ma iu ai ina tauau ina le mamalu Pulega a Alii ma Faipule. Ona ua tosoaina atu ai ma isi matai talavou, e faatuiese i le Pulega mamalu a Alii ma Faipule. O lea ua feoai isi loia ma taumafai e apo le tagata e toatasi, o lea e faatautee, e faatea atu e le nuu ae o mai i i, o le aia tatau a le tagata e toatasi. O le ala lena o lea e taua tele ai, le mea o lo o taumafai i ai le Faigamalo lenei. E faataua Pulega mamalu a Alii ma Faipule, e leaga o Alii ma Faipule o leoleo o le 24 itula. A o leoleo a le Malo, e tele lava ina valaaau mo le o atu e aumai, faataunuu loa le Tulafono. A o le Pulega mamalu a Alii ma Faipule faatasi ai ma Faletua ma Tausi, i la latou foi itupa o fanau, o le taofiofi o mea ia, prevention. O le puipuiga, puipuiga o le saogalemu, ma le puipuiga o ekalesia i totonu o nuu ma alalafaga, ina ia tatai tupulaga o le nuu, e auai ma faalogologo i le laugaina o Afioga Paia a le Atua. O a Afioga ia? O Afioga na aumai e le Atua ia Mose ma le Au Perofeta. O le fesili, o fea e faatupu ai le tofa lea na momoli ai Tulafono, e faapefea ona faatupu le tofamamao? O le tali, o le Atua le Tama. Na faapefea ona molimoli i o i tagata Israelu? Na molimoli i upu. O ai le upu? A lea e faaali mai e Ioane, sa i le amataga le Upu, o le Upu ua liutino tagata le Upu. Na momoli e Iesu, o le Upu i le taeao na ave ai Tulafono nei ia Mose. Ae mafua i se a? Na mafua i le alofa. O la le Agaga Paia lea. Na i ai uma le Tolu Tasi Paia i le taeao na molimolia ai Tulafono nei e 10 ia Mose ma le Au Perofeta. A o le auau o le 10 o le alofa. O le a le Tulafono lena? o le alofa o lo o taula uma i ai Tulafono ma le Au Perofeta. O le taua lena o le saunoaga a le sui usufono i le taeao lenei. Ua ia aumai manino ai le tulaga lenei i le galuega o lo o taumafai i ai leoleo. Ma o le taua foi lena o le pulega a leoleo. Ia silasila totoa ia i latou o lo o taofia i le tatou Falepuipui fou, i le tulaga lenei e ui lava ina ua soli le tulafono. Ae i ai le Pulega mamalu faa- Alii ma Faipule, e toe taitai lemu mai ai i latou. O le taua lena o le pulega a le Falepuipui, ina ia taumafai ina faaoo atu i ai Tu ma Aga faa-Samoa, pulega mamalu i totonu e aoao ai i latou i aga e tatau ona faia i totonu o nuu.

Lau Afioga i le Fofoga Fetalai, o le toe faaopoopo atu lena i le taeao lenei, ona o le taua o le saunoaga ua opea nei i le Maota.

FOFOGA FETALAI: Ia malo, faafetai ua manino le lautele ma le loloto o le taua o mataupu e pei ona sauia i le saunoaga a le sui mamalu. O lea ua faafogofoga foi i le faaopoopoga a le Palemia. Ia o itu taua lena ma le aoga.

Tulai mai le sui usufono mo Anoamaa e faaaauau le saunoaga.

Afioga ALAIASA MUAGUTUTI'A MOEFAAUOUO MALAGAITUTOGIAI SEPULONA MOANANAU: Lau Afioga i le Fofoga Fetalai, faafetai foi i le Afioga i le Taitai o le Malo mo le faamalamalamaga. O lea foi ua taua ai ma le Komiti o Tina, e tasi lea vaega taua o le faamoemoe o i ai. E tatau foi ona faafetai atu i la latou foi pitolaau aua foi le faamaoopoopoina o lea itutino o le tatou atunuu. Ia amuia foi tina o lea foi ua i ai le Matagaluega ua faapitoa mo Tina, ae sagai ane aua la outou pitolaau ina ia manuia Samoa. O outou foi o lo o nafa ma nisi o measina a lo tatou atunuu, o le fausiaina o measina a lo tatou atunuu. Ia faapena ona maua le gaegae e faatino ai ia itu uma aua se manuia o Samoa. E faafetai foi i aumaga ma aualuma, o outou o la outou faalupega masani, o le malosi o nuu, o le malosi o le atunuu. Ia faamanuia le Atua i la outou auaunaga. Se o itutino nei o le soifuaga, a galulue faatasi e le pine e le taumate le manuia o lo tatou atunuu. E le taumate le tau o faamanuiaga, e to foi manu, leaga o le upu, fai mai a tatou loto gatasitasi, e faatonu e le Atua manuia mo i tatou.

E faafetai foi i le Matagaluega o Faamasinoga, se ua ou tau matau lava i taualumaga o nei taimi, e pei ua tau i ai se mea ua va ai le fogavaa. Ia o le tagi lava a le pumate. E leai tatou te galulue faatasi e see lelei ai lo tatou sa. O a foi ni fetuatuanaiga i taimi ua sola, o le a foi sa outou matau mai i le Palestene, ia e vaatele lava i le tofa faale-Atua. A o le mea o lo o manaomia e Samoa o lo o tapuai mai, ia sologa lelei lo tatou atunuu. Leaga e afua mai mauga le manuia, a tatou fealofani, e fealofani Samoa. A tatou fetuatuuanai e faapena foi le tulaga e i ai lo tatou atunuu.

FOFOGA FETALAI: Malie le sui usufono se i toe tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e na o si mea lava lea, e faamalulu atu i le sui usufono. I lou lava talitonuga e leai se fetuatuuanai, o lea lava e galulue faatasi ia itutino e 3 o fefaatauagai, e agai e le isi itutino isi itutino. A o uiga lava ia o le soifua i le faatinoina o a tatou galuega, e i ai lava le taimi, e ese le taofi o lea ese le taofi o lea. E le faapea foi e avea se finagalo o se toatasi, po o se toa-lua o le a taenai uma mai ai le faamasinoga. E i ai lava le taofiga, o la lava e mau lava le toovae. I le tofa mamao a Faamasino, e i ai foi le faitau eseese, atonu foi sa i ai le manatu i lena taimi. O le mea lea e tatau ona fai, o le faalauaitele, ae faitau atu tatou, e pei ua faapolokiki. E i ai lava la le tulaga faapena e le faapea foi o i ai se atoa. Leaga e malosi lava le Alii o le lalolagi, e oo lava ia Iesu o le Atua na oo a, na asiasi lava i ai le tiapolo, ma toe faaososo. O le mea la lea, ou te taofi lava, o lea lava e mau le toovae i le galulue faatasi o itutino nei o le Faamasinoga faapea foi ma Pule Faatonu ma le Palestene

nei. E pei e i ai nai taimi faapena, e oo lava foi i totonu o la tatou vaega. E i ai foi taimi e faasea mai ai, o lea lava e aliali i totonu o le Maota. E te i lava ua pese mai lea, tiga lava na fautua atu aua e te pese, ae pese lava. Aisea? Leaga foi o isi manatu ia faafioloki, filosifia faafioloki. E pese le tatalo e tatalo le pese, e faapena foi i le lauga, e tatalo foi le lauga, e pese foi le lauga. O le ala lena, e le fou foi lenei mea o le pese, o le mea, e pei o le anava lea e lauiloa ai Samoa, o tagata pepese. E i ai le tama pese lauiloa sa amata lana taleni pese, sa pese ai totonu o se ekalesia i Dunedin i Niu Sila. Ona oo loa lea o ana aoga i luga i le Iunivesite, filifilia ia i mea e fai, pe faa-loia pe pese, ona ia tauaveina ai lea o le pese. Ua pese pese nei, ua le gafatia e le poto o Niu Sila ona toe faaopoopo atu. Ona maua lea o lana sikolasipi, ua alu sikolasipi i le ituaiga leo foi lea o le soprano. O le soprano e tusa na o le tenor, o le ato. E malamalama ai matou ia e lelei leo ma pepese i aufaipese a Ekalesia. Ona ave loa lea i Falani e ao ai le leo, e le gata la ina ao le leo, ae ao le faaleoga o upu, aua o le tele o upu nei o upu faa-Italia, o upu faa-Falani. O lea la ua lauiloa ma ua manaomia tele e fai ana faaaliga. E manatua la, o ana faaaliga o faaaliga pese, na o le au milionea e auai ma tagata mamalu. E i ai la le faaafe a le Tupu Tamaitai na fai, sa i ai uma tagata mamalu o Peretania, o Lords o alii sili, e tumu lava le potopotoga. O i la o tagata uma lava e le faia ni o latou fusiua uumi, ae fai fusiua e pei ni lipine i i, e fusi ai o latou laei ma suki e totoso mai lalo i vae, aua e oo loa i mea o faaafe faapea, o laei na e laei ai tagata nei maululuga.

Ia o mai foi la le vaega foi lea e aumaia uaina, o le aufaigaluega. Sau lava le alii lea ma le tray tele lava, sulu i luma o le tupu. Na ona sulu lava taei uma lava mea ia. E le i umi ona tupu le mea lena, ae sulu mai foi le isi alii i o, taei uma ipu uaina. Ona faapea loa lea o le alii lea, a'e se mea lea e leaga ai ituaiga galuega faapenei, e leaga totogi. Ae faapea mai le isi, e sili ia ona tuu ia ituaiga galuega faapenei maumau le taimi, ia pese loa. O le laua foi lena auala e fai ai le la faaaliga pese. Na ona pese atu lava o le alii lea tali mai le alii le la, ua matua tetei i le leo malie o le tagata. A o le pese lea e pese ai, o le pese lotu Samoa o le pese o le Lotu Taiti, o le a ou le tau atua le pese. Aua a ou tau atua, e toatele outou e le malamalama ai. O le matua tautaua o le tama lena, oo i le taeao, sau loa le faasalalauga, o le Samoa. Lau Afioga i le Fofoga Fetalai, e oo lava i le pese e mauluga tele le tautaua ai o le tagata. O le taimi lenei, Elvis Presley o le isi vaega uma ia e oti, ua le iloa po o a mea e faaaoga i ai a latou tuge, i le tele, ona o le lelei o le leo. O le mea la lea, se i vagana le tagata pese ae le malamalama i mea ia o le taua o le pese, ona faatoa fetuu lea o tagata e pepese i totonu o le Palestene lenei. O fea e toe tuu i ai leo, o lea ua faafogafoga mai le atunu atoa. O le avanoa lenei e tatau ona pese, se i faafogafoga le atunu i le lelei o pese o tatou o faipule. Ia manuia lau lauga.

FOFOGA FETALAI: Malo! E fautua atu i le sui usufono mamalu, aua foi e te seetia i le saunoaga a le Palemia. Aua o le isi pese e te toe sau ai, a o le isi pese e te le toe sau ai.

Afioga ALAIASA MUAGUTUTI'A MOEFAAUOUO MALAGAITUTOGIAI SEPULONA MOANANAU: E taua ia te au le fautuaga a le Taitai o le Malo. Ae ia te au ia, e maualuga lava lau vaai i le Fono lenei, ioe, i lona tulaga mamalu ma le tulaga maualuga. O le ala lea ua ou taua ai ou te le pese. E leaga a tatou oo mai loa i le Maota o Samoa, o le isi Fono e i luga atu o fono a o tatou nuu. A ou alu la i le fono a le matou nuu, fai fai sau tala ou pese ai, e lua lava mea e oo ia te au. E faapea le mea...o le toeaina ea pe i ua faaletonu le mafaufau, o ituaiga mea ia e fai ai tala. A ou sau la i le Maota lenei, e faamamalu, leaga o le Maota i Tiafau e mamalu, e paia. E le toe taalo fitifiti i ai se tagata. O le ala lea ua ou le toe...faamalulu atu ai i le Afioga i le Palemia, o le a ou le pese. Ae pei ona ou taua, e pau lava lea o le pese. Avatu le Viiga i le Atua, e pau lava lea. A o au na ou alu i le fono i Korea, e mafai ona ou avatua i lau Afioga.

FOFOGA FETALAI: Ia malie lau Afioga, se i tuu atu lava le avanoa i le sui usufono o le Vaimauga. E pei sa pese foi le sui usufono lea pe a?

Afioga Sulamanaia Fetaiai Tauiliili Tuivasa (Vaimauga Ssasae): Lau Afioga i le Fofoga Fetalai, e leai se manatu e faalavelave i le susuga...le lauga a Lufilufi. E pei ona ou taua e Susuga Lufilufi, Susuga Tuisamau. Ae leaga o lea e faafogfa si ou itumalo ma le atunu, e pei ua faatauagavale i le Maota lenei. E leaga o lea na muamua pese lenei itumalo. E pei o le ala lena na pepese ai isi sui usufono mulimuli mai, ona ua tatala le avanoa e lenei itumalo. O le pese o le tatalo e pei o le agaga lea o lea na faaali mai e le Taitai, e fauma ai se auaunaga ma se tala a lenei itumalo. Ona o la e faafogfa faapea o le a le tulaga sa pese ai. E pese e momoli le agaga o le faafetai. Ae ua avea le pese a lenei itumalo ma pese ai foi nisi sui usufono. O lea e le o alaala mai sui usufono ia o Olo ma...lea e tau faaleaga, e tau faaleaga i luga o upega tafailagi po o le leitio lea, se i tulou le TV a le EFKS, e faaleaga ai maua ma nai uso sa pepese. Ae sa tuu atu foi le avanoa e pepese, o le a le mea na le pepese ai? Ae ua uma ifo, e pei o le agaga lena lau Afioga i le Fofoga Fetalai. O lea foi ua toe pau le susuga a Lufilufi, leai, e ala la ona pepese o le agaga faafetai e ofo atu le ola. E ofo atu le auaunaga e tautua ai le itumalo.

E pei foi o lea e manino lava le saunoaga a le Taitai, e faapena o le tatalo foi lena leaga o lea e aumai i le Salamo, e pese lava Tavita so o se... o le tama pese lena i totonu o le Tusi Paia. E le leaga la le pese, ae na faaleo ai le ofoina atu o le auaunaga aua le tapuaiga a le itumalo. Ae pei o lea o le a tau ese le agaga o lea e aumai ai e Lufilufi aemaise sui usufono ia e le o

alaala mai o le taufaaleaga. Ae a omai i totonu o le Maota lenei, e le tautatala, ae o faifai mai i tua tauai maa mai i tua. O le Maota lenei e faaali ai finagalo, a o lea e le o alaala mai e pei o le agaga lena, o le taufaaleaga, ae na pese lava o le agaga ia o lenei itumalo leaga o lea e faalogologo le itumalo.

Ae faafetai i sui usufono ia na taufaaleaga, o la ua silasila i ai le itumalo i foliga, leaga o tatou e i ai o tatou aiga. E taufaifai na, ia e faapena ona silasila i ai itumalo ma aiga leaga e tele aa o le tagata. O le tau faaleaga atu i fafo atu o le Maota lenei, o le popolega na.

Lufilufi, o le uso a pese o le tatalo lava lena. Susuga oe, Susuga Tuisamau, ma lou faaaloalo i lau Afioga i le Fofoga Fetalai.

FOFOGA FETALAI: Ia malo, faafetai ua manino...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Se i tulai mai le Palemia...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai se mea e toe fia faaopoopo, ina ne i te i ua avea si au tamai agiagi, e tupu ai se vevesi. Ae o le mea moni, o lea lava matou te tietie lava i le sa e tasi. Sa ou amata si au tautalaga, i lou faapea atu, e pese le lauga, e lauga foi le pese, e tatalo foi le pese, e pese foi le tatalo.

O lona uiga, o le faatinoga foi lena o le isi faataoto, o le fiafia ina pese ia. E le mafai lava ona pese se tagata ma iloa pese se tagata e mata faasiasia. E ita, e le lelei le loto. E na o le tagata e mama le loto ma fiafia e pese leaga o lea e tautala mai ai le Salamo, “O le fiafia, ina pese ia”.

FOFOGA FETALAI: O lea la ua manino le faapupulaga. Ioe, o le pese, o le tatalo o le pese, e pese foi le tatalo. Ia Viia Le Alii. Malo faafetai. Tulai mai le sui usufono e faaaauau mai le saunoaga.

Afioga ALAIASA MUAGUTUTI'A MOEFAAUOUO MALAGAITUTOGIAI SEPULONA MOANANU: Ia, faafetai, faamalulu atu i lou uso ia Tuisamau. Faafetai foi i lenei avanoa ua maua ai e Tuisamau le avanoa e fai sao ai i le aualii ia sa faitio i lana pese. Ae faafetai tele mo le faamoemoe.

Ae o au sa ou alu i le malaga i Korea i le International Youth Fellowship lea na ave ai au e le tatou Malo i le isi taimi. Ia fai mai loa le Korea, aumai se tagata e usu sana pese, fai mai ia te au e usu se pese Samoa. Ia a outou faafogofoga la i lau pese e matautia. Ioe, o Lufilufi la, e le pupu i fale le ulavale

o Lufilufi, leai e fai i atunu mamao e masani ai. Ioe, e le gata i inei ae o atunu mamao, o i ina la faatoa faatino ai le pese a le sui usufono.

Ioe, ae faafetai i le faamalamalamaga matagofie. Ou te le o faitio foi e leaga le pese, leai o lea e tatou te lagona uma, o Salamo uma o le Tusi Paia o pese ia faaleagaga. Ia ua tele lona aoaoga mo tatou.

Ia e faaauau sau faafetai i le aufaigaluega a le Malo, lena 5 tausaga ma la outou auaunaga, faamalo tautua, faamalo galulue, ia o lea ua taumafai foi le Malo e fai ni taui mo galuega ia ae e le lava, leaga e le o feauautai le tulaga o tatou tupe maua. Ia ae tau ia o se mea e iloga ai, tauia la outou auaunaga. Ae o le matou lava tatalo, ia tautuana ia siitia i luga le tulaga o le auaunaga. Aua ne i fa ma se tau ane ai, aua foi ne i faia vaavaai i tulaga aloaia ma le tulaga... leai ia tutusa la outou vaai i tagata uma o Samoa o e sulu atu, sulu atu ia te oe, ave i ai le fesoasoani. Ia ona outou vaai lea i ai, se e amanaia ia e tagata o na mea. E o i tua ia nai o tatou tagata ma malaga i Salafai, ma le fiafia, ma le fiafia.

Ia e leai foi nisi e faitioina le Faigamalo, aua o sui usufono ia e na o... ao outou lea ua lima ma vae i ai la tatou auaunaga. Faamalo faafetai faamanuia le Atua, i la outou galuega fai. Ua i ai foi lava nai uso ua talanoa i...

FOFOGA FETALAI: Malo, masalo e tele se tapenaga a le sui usufono a?

Afioga ALAIASA MUAGUTUTI'A MOEFAAUOUO MALAGAITUTOGIAI SEPULONA MOANANU: Leai e le o toe umi foi.

FOFOGA FETALAI: Ia lelei, malo faafetai.

Afioga ALAIASA MUAGUTUTI'A MOEFAAUOUO MALAGAITUTOGIAI SEPULONA MOANANU: Lau Afioga i le Fofoga Fetalai, ia e i ai lava nai sui usufono leaga e pei ua tau faaosofia foi i lenei vaitau ua latalata foi i le faiga palota. A o au lava ia ma lau vaavaai i le tatou faiga lea e tatou te alu ai, o le mea lea o le Democarcy po o le faiga faatemokarasi. Ae tatou te le i omai i inei i totonu o le Maota lenei, o la lava sa i ai le au tete. Leaga e le au faatasi finagalo e au eseese. Aua foi la tatou te paoa fua le tulaga lea i ē o tete mai. E pau lava o lea, tatou milimili faalelei ma fai faalelei ina ia mau lelei lo tatou va.

E oo foi lava i lenei vaitaimi, tatou omai foi e faaulu o tatou igoa, ia ua te i foi i le vaai atu, ua toatele ia e mapuna ae o latou suafa i le faiga palota. Ia e leai se mea o le a tatou popole vale ai. E oo foi lava i ē ua le o i le faiga palota, ae o la lava e lagona lava le leo, leaga o le temokarasi lena o lea e tatou te o ai. E i ai lava le tagata e agaia se faamoemoe, o le mea lea e tatalo, fai malu lo tatou faiva, fai malu. Ioe, o le tatou taaloga foi lenei o le polokiki,

ia e manaomia lava le lava o le onosai. Ioe, aua foi e tatou te faia fua ni tala e faaleaga ai o tatou uso a tauva.

O lea o le a faiuiu se matou faamatalaga, ia lau Afioga i le Minisita o Tupe, momoli atu le matou faafetai. O lea foi ua faataatia i luma o le Maota o Samoa le Tala Faatatau Faaopoopo lea i le... ia e i ai lava le agaga o le tele o popo e sua lelei ai le lolo. O le tele o sulu e maua ai figota, ae momoli atu le faafetai i lau Afioga ma le Matagaluega ma le Ofisa Sili o le Matagaluega, faafetai le galulue, faafetai le lufilufi lima lelei aua se manua o Samoa. E le faigofie ona o lenei vaitau i le utiuti o le faasoa, ia a ua avea lava lau Afioga ua tu i matagiolo aua si o tatou atunu i lenei vaitaimi.

Ia e tatau lava ona oo sina au tala i le Vaega Faaupufai a le FAST. Ioe, ou te faafetai i le Afioga ia Laauli mo le faatulaiina o lenei faamoemoe. Ia faamalo galulue faamalo fai o le faiva. Ioe, sagai ane ai o le tai, ia to ni manu aua foi lo outou faamoemoe, ae e pei ona matou fai atu, o le tala la e i le Tusi a Paulo ia Filipi, "la outou maua manatu sa ia Keriso Iesu. O ia o le Atua sa uiga tutusa ma le Atua e le i manao e taofi, a ua faamaualalo ifo o Ia, e avea ma tagata mo oe ma au". Fai mai o le mea lea ua matua faaeaina ai e le Atua, ioe tootutuli ai tulivae uma ma tautau i laulaufaiva. O le agaga o Lufilufi, saili i lalo malo, tatou o i lalo e faapea foi i le HRPP, tatou o i lalo, to ni manu, aua Samoa. Tatou tuu i le Atua le tatou faiga filifiliga, ae a tatou o i luga, ia e matau mai i tatou ma faitauina lo tatou vaitau, faitauina lo tatou taimi. Fai mai o le mea ua matua faaeaina ai, e faaeaina le tagata e loto maualalo.

Lau Afioga i le Fofoga Fetalai, ia ou te le taua uma Afioga i Minisita ma galuega lelei, ae e silafia e le Atua, silafia e le Atua. Matagaluega o Faatoaga, ia ua a? O lea ua tua mai ua matua mau le atunu, ioe faafetai i fuafuaga lelei. So o se Matagaluega i mea o tekonomosi i nei vaitaimi, ia ua maeu le aoga. Talosia ia ia faaaoga lelei e fanau ia aua suesuega i le tele o latou meaaoga ma mea faapena. Ia, faamanua le Atua i outou faiva.

Ia ona faamuli lea o le matou tala i si ou itumalo lau Afioga i le Fofoga Fetalai...

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, e matau atu ma le agaga faaaloalo e fia maua se avanoa...

FOFOGA FETALAI: Tulai mai Laauli...

Susuga Hon Laauli Polataivao Leuatea: Ia, Tumua Lufilufi, e leai lava se agaga e faalavefau o tulei saunoa ma malele le faautautaga talu ai lo tatou va nonofo. Ia ae ua tulai lava i le ava ma le faaaloalo, matauina foi o lea ua e saunoa ma aumai le tuualalo. O le agaga moni lena, o le fatu foi lena o lea

e taumafai atu ai se taimi avatu se matou upu. Ae o le a tatou maea e tasi e tusa ma lau vagana i lenei aso.

O le a nofonofo foi leaga o lea foi sa saunoa mai foi Tuisamau i nai nisi foi o uso e le o alaala i nofoa, ae o lea lava e matou te taialalo le ia a Sa Saumanu. Ae tatou tiu i le latasi, o lagona na, o alofa foi na o lea matou te taumafai atu ai. Ia a i ai se taimi, ona fai lea o lo matou leo, ae faafetai mo le fautuaga. Ua logo i tino le oo mai o le tuualalo aua le tatou nofo lelei. Ia ma le agaga faaaloalo.

FOFOGA FETALAI: Malo faafetai ae mo le silafia i le Maota leaga o lea sa taua e le sui usufono o Vaimauga le sui usufono o Salega Sasae, le Afioga ia Fiti Olo. O lo o ua taunuu mai ia te au, logo mai au e le Failautusi o lea sa faafogaina mai le faanoi a Olo Fiti e le o maua le malosi. Ia talosia ia i le alofa o le Atua foai le malosi i si o tatou uso, maua mai se avanoa i le aso Fono a taeao. Ia e pei o le faaaliga lea a le Nofoa.

Tulai mai le sui usufono e faaiu mai le saunoaga.

Afioga ALAIASA MUAGUTUTI'A MOEFAAUOUOU MALAGAITUTOGIAI SEPULONA MOANANU: Faafetai i lau Afioga i le Fofoga o le Fono, ia faafetai foi i le saunoaga a lea foi itu o le malu. Ia o le agaga lava ia e tatou te... e pei lava ona matou taua, a fealofani Taitai e mautinoa lava e fealofani Samoa. A tatou fetuatanai, ia e faapena foi le tapuaiga a le atunu. Ia fai malu faiva aua le alo atu i le faamoemoe, ia ma ia i ai le agalelei o le Atua, leaga e taua ia te au fai mai le faaumiga o le upu, Faamuamua le Atua Samoa ua Tasi. A o tatou o la i le finagalo o le Atua, e ese le manaia ma matagofie.

Ae o le tapuaiga a si ou itumalo, ia faafetai tele lava, i le Paia o le Malae i Lalogaufua, o le Toaiga o Atua, lea na tofi ai Ao, ma Uso ma Iu o Atua. Le Paia aua le Afio o le Tuiatua, o le Tapaa Faasisina, pale feagai e oe le Fale Tuiatua o le Tapaaulefano, aua le Toaono ma le Saofaiga. E susu ai Seutaatia e Alaalamota, Susu ai Tupai ma Tainau Tuitui o le Tuiatua. Afio oe le Tumua, Susu Oe le Tumua Lufilufi. Malo faafetai, le nofo a faafeagaiga, le pule a alii ma faipule, ia o le mea moni foi o totonu o lenei itumalo, o lo o i ai se tasi o Kolisi Faafaifeau, aua le faasauni o alo ma fanau aua le galuega paia a le Atua. O la e faafogaga mai le Alii Pule o le Kolisi, nofo a Faiaoga, Tamaitai ma le Laumua i Piula, e momoli atu le matou agaga faafetai, le tapuaiga mau Lufilufi ia e le faagaloina. Ua mafai ona fai se leo o la outou auauna, ia ona o le mana o la outou tatalo faifaipea. Ia to ni manu aua lo tatou itumalo. Ia faamanua le Atua o lea ua tino mai nisi o faamoemoega e pei ona manaomia lo tatou nuu, ia e pei lava ona ou fai atu, ‘aua ia ne i ia te i tatou, ae ave le Viiga i Le Atua’.

Ia o lea foi ua uma ona talanoa mai le Afioga i le Minisita o Falemai, ia ua tuai lava o mea o tauofoga, ae o lea foi o le a faagasolo lo tatou Falemai. Ia

Viia Le Alii, faafetai i lo tatou Malo. Ia le Afio o le Sa Fenunuivao, Afio o Afoa ma le Matua ia Lefaoseu, ia matua ia Ki ma tagata ma le saofaiga ia te oe Lufilufi. Faafetai i si o matou nuu i Lalomauga, malo tatalo. Na taumafai atu lava le faamoemoe ae ua pupuu aao o le tatou Malo. E le uma ai le fai aso. Pau lava o lea, ia tatalo mai ma tapuai mai i faiva o le Malo e tino ai nisi o tatou faamoemoega. A o si o matou nuu lea, sa i ai se ata foi lea pei sa alu i luga o le initaneti i le avega o le isi maliu talu ai nei i le taimi o le louloua o le tau. Sa ave i luga o le auala maea foi lea sa tapena e le Malo o Niu Sila. Ia, ua fealualua solo faapenei le... a na tupu se faalavelave, o lona uiga e tae atu i Falefa le pusaoti ma tagata nei i le malosi o le vai. Ia, e le toe manao tatou e toe oo i ia mea, na gata i aso ia nei mea, ia alofagia, e i ai lava le tali e tali ai manaoga ia. Ma le agaga faaaloalo i lo tatou Malo. E tuutuu atu i o outou tafatafa pe a tusa ai ma le faasoa i sina auala aua a 4 aso e pa ai le vai lea, o le 4 foi aso lea e le omai ai i Apia le isi ituvasi. Ma le agaga faaaloalo. Ae faafetai. Afio o le Tapunu, afio le Fuaifale o Salevalasi, Usoalii ma Tagata o le Tuiatua, le Matua ia Tai ma Fonotia, aemaise le Saofaiga ia te oe le Tumua Lufilufi.

Lo matou nuu i Manunu, faamalo tatalo faamalo tapuai. Ia viia le Atua ona o lo outou faamoemoe, o lena foi ua tali atu le Malo i nisi o manaoga sa i ai, ae le uma ai le faiaso o le Atua.

Ia ona ou oo lea i si ou nuu o Falefa lau Afioga i le Fofoga Fetalai. Tulou le afio o Leutele o le Tuiatua faasaosao i le Faasuaga o Aiga o le Tina o Tupua, afio ai le Aloalii faapea foi le Tama a Aiga, afifio Taauso ma Atuga o Tamaitai, lau Tofa i le Matua Moeonoono, tainane Alo ma le Aiga Sa Alo ma le mamalu i le nofoaga o Alii. E faatalofa atu foi i le afio o lau Afioga Lealaisalanoa o le Tama a Malili e 4, o le Tei o Tupua, afio Falefa ma Usoalii, alaalatai lau Tofa i le Matua ma le Faimatua i Aauga, le mamalu o le Gautaala ma oe le Fuaava o le pulufanaoti a Lafaaaua.

E faatalofa atu foi i si ou nuu i le afio o Alaiasa ma le Aiga Sa Alaiasa o le vaa siitasi o Atua, o le na fitaituga na saili lona faleatua i lona aao malosi. Afio le Aiga Sa Alaiasa, afio Sagaeseese le Matua ia Faonuu ma le mamalu ia te oe le Usoalii. Faafetai mo la outou tatalo. Le afio o Suluvave o le alo o Tuiavii, alaalatai lau Fetalaiga Leuta ma e na pule i lea itu o le vai ma lea itu, alaalatai lau Fetalaiga Fulumua na falelima ia te oe le aai o le Tupu.

Afio Neioti ma Gagaeolo, afio le Alo o Malietoa, alaalatai oe le Falelima o le siitaga fita ma le mamalu o le tagata o le Tuiatua. O si o matou nuu i Falevao. E le faagaloina lau Afioga, leaga e tele le sao o nai ou nuu ia ua faapena ona o ese i lenei faiga palota ua loma nei. Ae afai lava o faafogaga mai, e au ina momoli i ai se faafetai a lo outou sui usufono.

Afio o Leutele o le Tina o Tupua, afio Muagututia o le Aloalii, afifio Usoalii, le Matua ia Limutau ma le mamalu o le Faletolu. O si ou nuu i Sauano.

Afio o Sefaatauemaga ma Aiga, afifio o Usoalii, tainane le alaalatai o oe le putuputu o tagata o le Tuiatua. O paia ia o si ou nuu i Saletele, lea o le a outou faipalota nei i le Vaa o Fonoti, ae le galo la outou puleto na afua ai ona seei la outou sui usufono i faalagamaea a le Malo.

A o le tala a le tatou sui usufono, e ui lava ina vavae outou, ae omai i mea fai a le tatou nuu. Ioe. Tatou feiloai pea i taeao afua e maua i le alofa o le Atua, tatou feiloai ma fesootai, leaga e tasi lo tatou itumalo.

Ia, malo faafetai Falefa, Falevao, Sauano ma Saletele, ua tiu la outou sui usufono i la outou faaaloalo. Faafetai i la outou filifiliga sa fai ua mafua ai ona matou nutimea manogi faatasi ma le paia ma le mamalu o le Palemene o Samoa. A o le matou tatalo, le paia o le itumalo, e ui lava ina poto le tautai, ioe, ae pisi lava lana foe ma le atoa i'a o lona faiva. O le a sa outou matau i la outou sui usufono, a o le a se aga ua le tautamalii, ia outou alofa o outou o le matua faitama, ia, faamagalo se vaivaiga o la outou auauna. O lea foi o le a tatou aga atu i le faiga palota, ia agalelei le Atua i sui usufono uma o le a tauva i lenei faiga palota. E toatele tamalii, e i ai foi nisi o tuafafine se i tulou o latou suafa maualuga o le a matou tauva, o lau tatalo, ia fai malu o tatou faiva. O upu ia sa fai e le tupu i Laloga fuafua, lea e gagana soo ai le tatou Maota, e taaalo lava tama a o le uso. E taaalo lava tama a o le aiga. O le mea lea, ia tatou tuu i le Atua. O ai lava e tusiaao i ai le itumalo, ia tatou ave faatasi le viiga ma le faafetai i le Atua.

Ia, ona faatai lea o so matou leo lau Afioga i le Fofoga Fetalai, e momoli lau faamalo i e o le a faapena ona faaseesee tuagalu ma tuafaiva ona o le finagalo o le a malolo manumalo i totonu o lenei Maota. Ua avea lava outou e momoli mai ai ia te i matou se feau taua, o le tautua-afu ma le tautua-liligi, ia o le pale lea o le tatou valaauiina. Lau Afioga Honorable Faasootauloa ma Leao Tuitama, Honorable Aeau, ia, faamalo faafetai. O le matou tatalo ia faafualoa e le Atua lo outou soifua aua Lana feau ma Lana galuega, aua nuu ma afioaga. Ua ou faalogo fai mai le isi sui usufono o le a fai lau Ekalesia lau Afioga i le Fofoga Fetalai. Leai, o oe lava o le poutu o le Ekalesia, ioe, o oe ua e masani.

Lau Afioga Toleafoa Faafisi ua ou tapafua i lou suafa e le o se tuli ua vale, malo faatoatoa, ioe. Ua inu malie le Maota lea i lau tofa faatupu ma lau tofa faatamalii. Ua faafogofa foi Samoa ma le lalolagi atoa, se e iloga lava le tamalii ia i ana aga. Matou te le selu atu. Ioe. A o le ta aiga i Fasitoo-uta lau Afioga, leai sa vaai i ai mata ia, a ua i ai le manatu ia Alaiasa, ua lava ia oe ua e lima malosi e te faia le ta aiga. E i ai se taimi, i ai se aso, ia e faapena. O le matou tatalo, ia faamanuia le Atua i lau Afioga, faamanuia le Atua i lau Afioga. Ou te talitonu foi e i ai nisi mea o le a valaauiina ai oe ma faaaoga i ai lou soifua, a o oe lava o se faamanuia mo i matou.

Ia, lau Afioga i le Taitai o le Malo lau Afioga i le Palemia, faafetai. O la e tietie uma i lau Afioga le mamafa e le gata o matou sui usufono, ae faapea manaoga ma finagalo o le tatou atunuu. Faafetai toa, ioe. Ua ou faalogologo

mai le isi aso o taua le Aiga Sa Fenunuivao, ae leaga e sao, na pau lava lea o le matai e maualuga ai le Toeaina ia Samoa o le Aiga Sa Fenunuivao, leaga o le aiga o le Tupu, ioe. O le mea lea lau Afioa, e alofa tele Malaga ia te oe, ta te uulima lava faatasi se i oo i le oti. Ioe, po o fea lava e fai i ai aga a le aualii ia, o lea lava ou te mataitu lelei, na pau lava o lea, ia toa oe le Tama, aumai lau tofa faa-Tama e soalaupule ai mea uma. Ia faamanuia mai le Atua.

Ia, o le matou tala o le a foi, ioe. Ae ou te manatua le ausaga lea na alu i le itu i sasae, fai mai ua vaai atu i le afi ua asuasu mai, ona taumafai lea o le isi e aau muamua, ae fai mai le isi teine, “manatua le ta Tulafono sa fai, e sa le aau muamua,” lea e maua ai Saleaumua. Ioe. Ona ou iloa lea, o le agaga o lo o momoli mai, a tatou aau faatasi, e manuia lo tatou faamoemoe. O upu foi e fai i manufelegelei, “Birds that fly together fly further.” A tatou felelei faatasi, e tau ma mamao le mea e vaai i ai Samoa. O lale e tapuai mai Samoa, ioe. O lale e tapuai mai Samoa.

Ia, o le matou tala, to ni manu mai le lagi aua le Maota o Samoa. O se tala foi ua taulaulu i lenei taeao ma le tautamalii, ia faamagalo lo outou uso po o la outou auauna. Ia faamanuia tele le Atua i lenei aso. Soifua ma ia manuia.

Na faaalia le agaga fiafia o le Palemene i le patipati o latou aao i le maea ai o le saunoaga a le sui usufono mo Anoamaa Sasae.

FOFOGA FETALAI: Ia, ua faamalo saunoa i le sui usufono mamalu, ua faamalo foi Lufilufi ua e saunoa faa-aiga ua e fetalai foi faa-susuga Lufilufi. Ia matou te le tauilo, leaga o au fatuaiga tausi. O le mea la lea e momoli atu ai le faafetai ma le faamalo. Ua faafogaga Samoa, Lufilufi malo le fai o le faiva, e pei lava o le fetalai i le Ulumu ma Lefaoaseu. Ia o le upu lava e fai i Atua. O le mea la lea, malo faafetai matou te le toe faafuluina le Susuga Lufilufi po o le saunoaga foi ia te oe Sa Fenunuivao. Ia o le tulaga lena, e ui lava ina i ai nai mea e fia faasao, ae i ai le manatu, tatou tiu ia i latasi le tulaga o le saunoaga ma le susuga. Ona faapea lea, lolo so matou taofi, ona e i ai lava taimi foi o fea lava le agi agai i ai le finagalo o Lufilufi ma Tumua, ia matou te taalolo lava, o le mea lava e tasi, o Samoa o le aiga. Ia, malo faafetai.

Ia, e i ai le manatu e fai ni ai o le Fetalai i Lufilufi po o le Susuga a Lufilufi, o le a tatou vave manava ia i lenei aso ua lava lea taimi galulue ae faai ia Lufilufi le saunoaga e moe ai le toa o le Fono Aoao Faitulafono seia aulia le aso Fono a taeao tulai mai se isi sui usufono e tele le loto e tamua.

Ona faapea lea, ae tatou te le i tolopo, ou te tapa le sui usufono mo Aleipata Itupa i Luga e tulai mai e faai le tatou Fonotaga i se tatalo.

Na tolopo Taualumaga a le Fono Aoao Faitulafono i le itula e 12:53 i le aoauli seia aulia le Aso Lua, 2 Fepuari 2021 i le itula e 9:00 i le taeao.